

Xojon carta-la San Pablo xi kiskii-la xita naxandá-la Cristo xi títsajna Roma

*Kó tsò Pablo nga síhixat'aà jñà xita naxandá-la
Cristo xi títsajna Roma*

¹ Jè xojon carta jè, 'aán tikjiì-nò xi Pablo 'mì-na xi chí'nda-la Jesucristo ma, xi xó kiìchja-na Nainá nga 'an tsibíxáya-na kò xó kitjaàjìin-na nga 'an sika'bísoàn 'én ndaà-la Nainá.

² It'aà ts'e 'én koi, Nainá jye k'oa'sín kitsjaà tso'ba nga tisa kjòtseé, koni s'ín tíchja Xojon Tsjeè-la xi kiskii xita xi kiìchja ngajo-la Nainá. ³ Nga ya tíchja it'aà ts'e Ki'ndí-la, jè Nà'èn-ná Jesucristo xi jè otíxoma-ná. Koni xita isò'nde, yaá inchrobàt'aà-ne tje-la xitaxá ítjòn David. ⁴ K'e nga jaáya-la it'aà ts'e kjoabiyaà, Jesucristo, k'oaá s'ín kiyaxkon-la nga Ki'ndí-la Nainá-né xi tse nga'ño tjin-la koni s'ín ndaà síkichiya-ná jè Injima Tsjeè-la Nainá xi sítsjeè-ná. ⁵ It'aà ts'e Jesucristo, kitjoé-na kjondaà nga 'an tsibíxáya-na nga kènojmiya-la 'én ndaà-la jñà xita naxandá xi tjin nga títsa isò'nde nga kàtasíkitasòn kò kàtakjeiín-la it'aà ts'e Cristo, mé-ne nga jeya kíjna-ne Cristo. ⁶ Tíkooá jñò, xó kinokjoà-nò nga xita-la Cristo k'oín-nò.

⁷ Tikjiì-nò ngats'ioè xi títsajnaà Roma xi matsjakeè-nò Nainá nga tíkoa xó kinokjoà-nò nga xita tsjeè-la koma.

Nainá xi Na'èn-ná, kò jè Jesucristo xi otíxoma-ná kàtatsjá-nò kjòndaà kò kjoa'nchán ya jjiin inima-nò.

Mé-ne mejèn-la kjoì Roma jè Pablo

⁸ Xi mats'ia-ne, it'aà ts'e Jesucristo tsjaà-la kjòndaà Nainá xi it'aà tsajòn, koi kjoa-la nga xkì xi ján naxandá xi tjín nga tíjtsa isò'nde, na'yá-nò nga ndaà mokjeiín-nò it'aà ts'e Cristo. ⁹ It'aà ts'e Nainá xi 'an sixá-la nga tíjngoò takoàn nga sika'biá 'én ndaà-la xi kjoa ts'e Ki'ndí-la, jè tíbèè nga nàchrjein nchijòn síkítsejèn-nò k'e nga chjàt'aà-la. ¹⁰ K'e nga bìtsi'ba-la Nainá, k'oaá s'ín síjèt'aà-la tsà ikon xi tsò nga chaán tsjá'nde-na nga kjíkon-nò. ¹¹ Tíkoáá mejèn-na skoexkon-nò mé-ne nga tsja chiba-nò kjohítsjeèn ts'e inima-ná mé-ne nga ìsa kixi kítajna-nò. ¹² Jè xi tìxan-nò nga ngàsòn k'oi-lá nga'ño xinguiáá it'aà ts'e kjoa xi mokjeiín-ná.

¹³ 'Ndsè, tichja, mejèn-na nga kàtasijjìn-nò nga kjòtseé tjín-ne nga kjíkon-nò tanga skanda i'ndeì mì tà jngoò kjoa bíchjoà ikòn-na. Xi kjohítsjeèn ts'an, jè xi mejèn-na nga siixáko-nò jño, koni s'ín kisixá ñánda nga xìn naxandá mé-ne nga tíkoá skoeè-na kjòndaà-la xá-na xi 'an s'iaàn it'aà tsajòn. ¹⁴ Tjínè-na nga kokòya-la ngats'iì xitá xi 'én griego chja kò xi mìkì chja, xitá xi tjín-la kjoachjine kò xi tsjìn-la. ¹⁵ K'oaá ma-ne nga 'ño mejèn-na nga tíkoá kichjàyajjìn-nò jè 'én ndaà-la Nainá xi kjoa ts'e Cristo, jño xi títajnaà naxandá Roma.

Mé nga'ño xi tjín-la 'én ndaà-la Nainá xi kjoa ts'e Cristo

¹⁶ Mìkì masobà-na it'aà ts'e 'én ndaà-la Nainá xi kjoa ts'e Cristo, nga nga'ño-la Nainá-né. Jè 'én xi

ma-la síkítsajnandeíj x̄it̄a kjoa ts'e jé, ngats'ìì x̄it̄a xi mokjeiín-la ìt'aà ts'e, mats'iāko-ne j̄n̄a xi x̄it̄a judío ko t̄ikoa xi mìtsà x̄it̄a judío. ¹⁷ J̄n̄a 'én ndaà-la Nainá xi kjoa ts'e Cristo okó-ná kós'ín s'ín Nainá nga síkixi x̄it̄a. Tà jè-né nga mokjeiín-la ìt'aà ts'e Cristo mé-ne nga ìs̄a ndaà kòkjeiín-la. K'oaá s'ín tíchja Xojon-la Nainá nga tsò: “Jè xi x̄it̄a kixi, ìt'aà ts'e kjoa xi mokjeiín-la kíjnakon-ne.”

Jé xi t̄jín-la x̄it̄a isò'nde

¹⁸ Nga jè Nainá skanda ján ngajmii tíhokó kjoajti-la ìt'aà ts'e x̄it̄a xi mìkiì beèxkón ko xi ch'o s'ín. Jè kjohítsjeèn ch'o xi t̄jín-la mì kì tsjá'nde-la nga kjoétjò xi kjoakixi. ¹⁹ Jè kjoa xi 'ya-la ìt'aà ts'e Nainá, ndaà t̄jiiin-la j̄n̄a x̄it̄a koi, nga t̄jè-ne Nainá tíhokó-ne. ²⁰ Nga j̄n̄a kjoa ts'e Nainá xi mìkiì tsejèn, ndaà t̄iyaxkon-la kóni nga t̄is̄a kisindaà isò'nde. Yaxkoón-la nga t̄jín-la nga'ñó Nainá n̄it̄a mé n̄achrjein-ne nga tà jè t̄ajngoò xi Nainá 'mì. Kjoa koi tí'yaá-la ìt'aà ts'e tsojmì xi tsibíndaà Nainá. K'oaá ma-ne nga j̄n̄a x̄it̄a mì kì koma kíjchako yijo-la nga kítsò: “Mìkiì t̄jiiin-na tsà t̄jina Nainá.” ²¹ J̄n̄a x̄it̄a nas'ín t̄jiiin-la nga t̄jín Nainá xi tsibíndaà isò'nde, t̄anga mìkiì jeya kisikíjna, n̄i mìkiì kitsjaà-la kjondaà. T̄a saá tà koií 'ñó ndaà kisis'in-la kjohítsjeèn xi n̄imé ch̄j̄i-la. Kjohítsjeèn tájaà-la kisijñò-la. ²² Xi kjohítsjeèn ts'e, x̄it̄a ch̄jineé kitsò-la yijo-la; t̄anga mìtsà kixi kjoa, x̄it̄a n̄chikón-né. ²³ Kisikíjnat'aaxìn Nainá xi jeya t̄jina xi mìkiì fehet'aà n̄achrjein-la; t̄a saá koi kijtseèxkón isén ts'e x̄it̄a xi fehet'aà n̄achrjein-la; skanda j̄n̄a isén-la chò xi t̄jímajiiin isén kijtseèxkón, ko isén-la chò xi ñijòn ma ndsoko ko isén-la ye.

24 Koií kjoa-là nga kitsjeiìn takòn Nainá nga taxki kàtas'ín nga kàtas'ín nità mé kjoa chinga xi bitjokàjiìn inima-là. K'oaá ma-ne nga tsohótsji-là kjoa sobà yijo-là koni s'ín kisiko xíkjin. 25 Kisìkjatjyaá-là kjoa kixi-là Nainá; 'én ndiso kiskoé. Jñà kijtseèxkón koa jñà kisitsjako tsojmì xi jè Nainá tsibíndaà. Mitsà jè kijtseèxkón koa kisitsjako Nainá xi tsibíndaà tsojmì. Nainá kàtayaxkón nità mé nàchrjein-ne, k'oas'ín kàtama.

26 Koií kjoa-là nga kitsjeiìn takòn Nainá nga ko s'ín kàtas'ín-ko yijo-là kjoa sobà xi ch'o tjín. Jñà íchjín kisìkjatjyaá-là koni s'ín mochjeén x'in; tjín íchjín xi tijñà xíkjin kiskoé-ne. 27 K'oaá tis'ín kis'iìn íchjá, kitsjeiìn takòn-né koni s'ín mochjeén íchjín. Tjín íchjá xi 'ño kisaseèn-là nga ti x'in xíkjin tsoyijòko-ne. Tsohótsji-là kjoa sobà yijo-là. K'oaá ma-ne nga kjo'in kis'e-là xi ti yijo ts'e-ne koni s'ín ok'in-là kjoa ch'o xi kis'iìn.

28 Xità koi, mìkiì kisìkítsjeèn tsà mochjeén-né nga skoexkon Nainá; k'oaá ma-ne nga kitsjeiìn takòn Nainá nga kàtasíkjeén kjohítsjeèn-là xi nì méé chjí-là mé-ne nga k'oas'ín kàtas'ín-ne kjoa xi mìkiì ok'in-là. 29 Xità koi, yaá tjíjiìn yije inima-là ngats'ii kjoa xi ch'o tjín koni: kjoa chijngui, kjoa ts'en, kjoa tse mejèn, kjoa toòn, kjoaxìtakòn, kjoa nga ma-là sík'en xità, kjoa xi kjaán-kjoò, kjoa konachan, kjoa xi ch'o s'ín, kjoa 'én ndiso; 30 nga chjajno-là xíkjin; nga síjtikeé Nainá; ochrjengui xíkjin; 'nga ikon; ndaà síkijna yijo-là; síkítsjeèn nga mejèn-là isa ch'o tjín kjoa xi s'iìn; mìkiì 'nchréñjon-là xità jchínga-là; 31 mìkiì machiya-là; mìkiì síkitasòn 'én xi chja; mìkiì beètjò xità xíkjin; tsjìn-là kjoa nìjchàat'aà; koa

tsjìn-la kjoahimatakòn. ³² Jñà xità koi, ndaà tíjìn-la nga k'oaá s'ín tsjá okixi Nainá: ngats'iì xi k'oa tjin kjoa xi s'ín, ok'ín-la nga kiyá. Tanga mìkì majngoò ikon nga tà jñà xi k'oas'ín, skanda tikoáá matsja-la k'e nga k'oa tìs'ín xità xi kj'eíí.

2

Nainá, mé xi tsjá-la xità xi ndaà s'ín ko xi ch'o s'ín

¹ K'oaá ma-ne, ngaji, nità yá xità-ne ji, nga jé onè-la xinguii, mìkì koma kosikoi yijo-lè nga nguixkon Nainá. K'e nga jé tìbìnè-la xità xinguii, tikoáá ngaji, tiji tìbìnè-la jé yijo-lè nga k'oa tìs'ín 'nì. ² Tanga 'ya-ná nga kixi s'ín Nainá k'e nga tsjá-la kjo'in jñà xità xi koa tjin jé xi ótsji. ³ Ngaji xi kjo'in bìnè-la xità xi kj'eíí, ¿mé-ne koa s'ín nìkìtsjeèn-ne nga jchat'aà-lè kjo'in xi tsjá Nainá? Nga ji k'oaá tìs'ín 'nì. ⁴ ¿A mì tíjìn-lè nga nachrjekàngui jè kjondaà-la Nainá nga tjin-la kjojetakòn koa tjin-la kjoatsejta? ¿A mì tíjìn-lè nga jè kjondaà-la Nainá tíkoña-né nga s'ikájnoi jé-lè nga mì tì jé kinchátsji-ne? ⁵ Nga tájaàjìn tjin inima-lè nga mìkì nìkájnoi jé-lè, isaá tse kjo'in tìbìnè-la yijo-lè xi tsjá-lè Nainá jè nachrjein k'e nga kjoíko kjoajti-la nga jcha-la kós'ín kixi koiindaàjìn Nainá nga tsjá-la kjo'in jñà xità. ⁶ Nainá tsjá-la chjí-la mé kjoa xi kis'iìn nga jngoò ìjngoò xità. ⁷ Tsjá-la kjoabinachon nità mé nachrjein-ne jñà xità xi nchihótsji kjoajeya, ko nchihótsji nga jchaxkón, ko nchihótsji nga kítsajnakon nità mé nachrjein-ne ján ngajmì. Koií kjoa-la nga ndaà tjin kjoa xi nchis'ín nga kjit'aà nachrjein. ⁸ Tanga Nainá nga ko kjoajti-la tsjá-la kjo'in jñà xità xi kondra fi-la

nga mìkìl 'nchréñijon xi kjoa kixi. Tà kjoa nchikón fitjingui-la. ⁹ Tsee kjoa s'e-la kò tsee kjo'in s'e-la ngats'iì xita xi ch'o s'in, mats'ia_kò ítjòn-ne jña xita judío, tiko_aá kò xi taxki xita xi mitsà xita judío. ¹⁰ Tanga jña xita xi ndaà s'in, tjoé-la kjoajeya, ndaà jchaxkón, tiko_aá s'eé-la kjoa'nchán inima-la, mats'ia_kò ítjòn-ne jña xita judío, tiko_aá kò xi taxki xita xi mitsà xita judío.

¹¹ Nainá mìkìl faájìin nita yá xita-ne, tà ngásòn fikò yije. ¹² Ngats'iì jña xita xi mìkìl tíjìin-la kó tsò kjotíxoma xi kiskìl Moisés, k'e nga jé ótsji, chija-né nas'in mìkìl kijtsee kjotíxoma-la Moisés. Ko_a jña xita xi ndaà tíjìin-la kjotíxoma-la Moisés, k'e nga jé ótsji, k'oaá s'in kojtsò koni s'in tíchja xi tijè-ne kjotíxoma. ¹³ Jña xita xi tà 'nchré-la kjotíxoma xi kiskìl Moisés, mitsà jña xi xita kixi nga nguixkòn Nainá. Jña-né xi xita kixi xi sikitasòn. ¹⁴ K'e nga jña xi taxki xita xi mìkìl tíjìin-la kós'in tíchja kjotíxoma-la Moisés, sà k'oaá tà yaá nchrobájiin inima-la nga k'oas'in s'in koni tsò kjotíxoma-la Moisés, yaá 'ya-la nga tiko_a tíjìin inima-la kjotíxoma xi ts'e nas'in tsjìn-la ts'e Moisés. ¹⁵ K'e nga ndaà s'in yaá 'ya-la nga tíjìin inima-la kjoa xi síjé kjotíxoma-la Moisés; jè inima-la okó kjoa xi ndaà tjín kò xi mìkìl ndaà tjín; tijè-ne kjohítsjeèn-la sà k'oaá óngui kò sà k'oaá osìkò. ¹⁶ K'oaá s'in koma jè nchrjein k'e nga Nainá koìndaàjiin ngats'iì jé xi jí'ma-la xita jiin inima-la; it'aà ts'e Jesucristo sindaàjiin, koni tsò 'én ndaà-la Nainá xi kjoa ts'e Cristo xi 'an chjaya.

¹⁷ Ngaji xi xita judío 'mì-lè; jè ma'ñót'aà takòin kjotíxoma xi kiskìl Moisés; 'ngaá ma takòin it'aà ts'e

Nainá nga si tsiji-né; ¹⁸ ya-né mé xi mejèn-la Nainá nga sikitasoìn; ma-lè chjaàjiìn mé kjoa xi nguì ndaà tjin koni s'in okóya-lè Kjotíxoma; ¹⁹ k'oaá s'in níkítsjiìn nga tǐngòò takoìn nga ji okoò-la ndiyá kixi xita xi mìkii machiya-la nga tíchjoà xkòn kò k'oaá ma-lè nga ji ñihiseèn-la xi tǐjǐñò kjohítsjeèn-la. ²⁰ Ji, k'oaá s'in níkítsjiìn nga ma-lè okoòya-la xi taxki xita xi tsjin-la kjohítsjeèn; nga maestro 'mì-lè ts'e xita xi chiba ma-la it'aà ts'e Nainá; nga tjin-lè kjoa chjine kò kjoa kixi xi okó-lè it'aà ts'e Kjotíxoma. ²¹ Ji xi ma-lè okoòya-la xita xi k'ejé, ¿mé-ne mìkii okoòya-la xi tǐ yijo tsiji-ne? Ji k'oaá s'in nokjoàyi nga mìkii ma sìchijé; ji, ¿mé-ne ñichijé-ne? ²² Ji, k'oaá si nga mìkii ndaà tjin nga kjoa chjingui s'iin xita; ji, ¿mé-ne nga k'oa tǐs'in 'nè-ne? Ji, k'oaá si nga jtichii xkósòn; ¿mé-ne nga ingò bitjaàs'en-ne nga ñichijí tsojmi-la xkósòn? ²³ Ji, 'ngaá takoìn nga ndaà tjiìn-lè kjoa ts'e kjotíxoma tanga, ¿a mìtsà tìnachrjekàngui Nainá nga mìkii níkitasòn-la koni s'in tíchja kjotíxoma? ²⁴ K'oaá s'in tíchja Xojon-la Nainá nga tsò: “Kjoa tsajòn-nò xi xita judío 'mì-nò nga chjajno-la Nainá jǐà xi taxki xita.”

²⁵ Tsà ndaà sikitasoìn kjotíxoma xi kiskii Moisés, jè kjoa ts'e circuncisión nga tǐt'aà chiba-lè, chjí-la-né; tanga tsà mìkii sikitasoìn, k'oaá ngaya-la koni tsà mìkii tǐt'aà chiba-lè. ²⁶ Jǐà xi mìtsà xita judío, nas'in mìkii tǐt'aà chiba-la koni xita judío, tanga tsà kixi síkitasòn kjotíxoma ts'e Moisés, Nainá skoétjò-né koni tsà tǐt'aà chiba-la. ²⁷ Jǐà xita xi síkitasòn kjotíxoma ts'e Moisés, nas'in mìkii tǐt'aà chiba-la yijo-la, jǐà koiindaàjiìn-nò nga mìkii níkitasòn nas'in tǐt'aà chiba-nò, nas'in tjin-nò

xojoṇ ts'e kjoṭixoma-la Nainá. ²⁸ Jngoò xi xita judío, mitsà tà jè nga ndaà 'ya-la kjoa xi s'in; koa jngoò xita xi tjít'aà chiba-la kjoa ts'e circuncisión, mitsà tà jè xi mochjeén nga tjít'aà chiba-la isò'nga yijo-la. ²⁹ Jè xi nguì xita judío, jè xi chjí-la koni s'in tjín ijìin inima-la. Ko jè xi nguì tjít'aà chiba-la, jè xi chjí-la koni s'in tjít'aà chiba-la ya ijìin inima-la. Kjoa koi, mitsà ts'e kjoṭixoma xi xojoṇ tjít'aà; ts'eé Inima Tsjeè-la Nainá. Jñà xi k'oas'in síkitasòn, Nainá ndaà chja xi it'aà ts'e, nas'in mìkiì ndaà chja xita xi kj'eíí.

3

Mé kjoa xi 'ñó chjí-la it'aà ts'e xita judío

¹ Tsà k'oaá s'in tjín, ¿mé kjondaà xi isa tse tjín-la nga xita judío 'mì? Ko ¿mé chjí-la nga tjít'aà chiba-la? ² Kjìn skoya chjí-la. Jè xi tjína ítjòn, jè-né nga jñà xita judío kjòngatsja 'én-la Nainá. ³ Jñà xita judío, nas'in tjín i'nga xi mìkiì síkitasòn 'én xi kjòngatsja, ¿a koma sikjatjìya-la kjoakixi-la Nainá nga mìkiì kítasòn koni s'in kitsjaà tso'ba? ⁴ Majìn, mìkiì koma. Nainá, xita kixi-né, nas'in xita ndiso ngats'ìì xita xi tjín isò'nde; koni s'in tíchja xojoṇ nga tsò:

Mé-ne nga kàta'ya-la nga kixi kjoa 'én xi nokjoi sikijne-né k'e nga ya xi kòhòngui-lè.

⁵ Tjín i'nga xita xi tsò: K'e nga ch'o 'nè, isaá ndaà 'ya-la kjoakixi-la Nainá. Tsà k'oas'in tjín, ¿kó kixoán? ¿A kixón-ná nga mì kjoa kixi tís'in Nainá nga kjo'in tsjá-ná? (Tsà kos'in kixoán, jngoò kjohítsjeèn-la xi taxki xita titsanìkjeén.) ⁶ Tanga majìn, mì k'oaá s'in tjín. Tsà mitsà kixi s'in Nainá

nga kjo'in tsjá-ná, ¿kós'ín koma koìndaàjìlìn-la xìta isò'nde?

⁷ Tìkoáá tsà k'oa kìtso xìta koi: “Tanga tsà kjoandiso-na okó nga jè kjoa kixi-la Nainá isa jeya kíjna, ¿mé-ne k'oas'ín tísìnè-na nga xìta jé tíyatakòn-na?” ⁸ Tìkoáá-ne ch'o s'eén mé-ne nga kátasakó-isa-ná kjondaà-la Nainá. Tjín xìta xi kòtsò nga k'oaá tjín 'én xi okoòya; jè xi mejèn-la nga ch'o síkíjna-na. Jñà xìta xi kòtsò, ok'ín-la nga tjoé-la kjo'in xi Nainá tsjá.

Mé jé xi tjín-la ngats'ì xìta

⁹ ¿Kó s'ín nìkìtsjeèn? Jñá xi xìta judío 'mì-ná, ¿a isaá ndaà xìtaá koni jñà xìta xi kj'ejí? Majìn, jyeé k'oaá kixan-nò, tà ngàsòn jé tìtsajnajñaá ngats'iaá xi xìta judío 'mì-ná kò xi taxkì xìta. ¹⁰ Koni s'ín tíchja Xojon-la Nainá nga tsò:

Nijngoò xìta tjín xi xìta kixi, nì tsà tà jngoò.

¹¹ Nijngoò tjín xi machiya-la,

nijngoò tjín xi ótsji Nainá.

¹² Ngats'ì xìta, saá xìn ndiyá kii; ngats'ì nímée chjí-la kjoa xi s'ín;

nijngoò xi ndaà s'ín, nì tsà tà jngoò.

¹³ Naxájtá-la, k'oaá kjoàn koni ngajo-la mik'en k'e nga táx'ajto;

nijen-la nguì 'én ndisoó chja;

'én xi chja, k'oaá ngaya-la koni tsà xán-la ye.

¹⁴ Chjajno-la xìta kò nguì koi 'én chja xi 'on ma-la inima-ná.

¹⁵ Mikiì koña kjoa, nitoón sík'en xìta.

¹⁶ Nìta ñánda nga fì, síhima kò síkjehesko xìta xi kj'ejí.

¹⁷ Mikiì beèxkon ndiyá ñánda tjín kjoa'nchán.

18 Mikiì tsakjón-keè Nainá it'aà ts'e kjoa xi s'ín.

19 Jyeé 'yaá nga ngats'iì 'én xi tjit'aà kjotíxoma ts'e Moisés, jñá chja-la ngats'iì xita xi ya fit'aà-la, mé-ne nga ngats'iì xita, mikiì koma kichja nga kinchako yijo-la nga nguixkon Nainá; ngats'iì xita xi tjín isò'nde koìindaàjìin-la Nainá nga jcha-la nga jé tjín-la. 20 Njingoò xita xi kixi kína nga nguixkon Nainá tà koi kjoa-la nga ndaà tísíkitasòn Kjotíxoma ts'e Moisés. Nga jè Kjotíxoma, tà k'oaá s'ín mochjeén nga bénojmíya-ná nga jé tjín-ná.

Kó síko-ná Nainá nga kixi kitsajnaá nguixkon jè

21 Tanga i'ndeì, Nainá okó-ná kós'ín s'ín Nainá nga xita kixi beètakòn-ná. Kò mìtsà kjoa ts'e Kjotíxoma nga bitasòn. Jñá xojon jchínga ts'e kjotíxoma-la Nainá kò ts'e xita xi kiichja ngajo-la Nainá k'oaá tìs'ín bénojmíya-ná, 22 nga jñá xita k'e nga mokjeiín-la it'aà ts'e Cristo, kixi bìtsajna nguixkon Nainá. K'oaá s'ín síko yije kóhótjín xi mokjeiín-la. Nga ngats'iì xita ngàsòn jé tjín-la, 23 nga ngàsòn ótsji jé-né; kjiìn títajnat'aàxìn-la Nainá ñánda nga jeya tíjna. 24 Tanga Nainá, nga ndaà xita, kitsjaà kjotjò-ná kjondaà-la mé-ne nga kixi kitsajnaá nguixkon jè. Jè Jesucristo tsibíhjtjì ngajo-ná jé-ná mé-ne nga kitsajnandeì-ná xi kjoa ts'e jé. 25 Nainá kitsjaà ki'ndí-la koni jngoò kjotjò xi faáxìn jé-ná nga nguixkon Nainá k'e nga mokjeiín-ná it'aà ts'e Jesucristo, nga jè tsibíxteèn jní-la k'e nga k'en. Nainá k'oaá s'ín okóya-ná kós'ín tjín kjoakixi-la. Koií kjoa-la nga ngasa kjótseé, Nainá, tíkoña kjoa-né, mikiì nìton kitsjaà-la kjo'in xita koni s'ín ok'in-la jé xi tsohótsji. 26 Tanga i'ndeì tí'ya-la nga it'aà ts'e Jesucristo tísindaàjìin-la xita

jñà kjoa-la jé xi kisìchroba mé-ne nga kàta'ya-la Nainá nga x̄it̄a kixi-né k̄o t̄ikoáá t̄jè-ne Nainá xi kixi síkítsajna x̄it̄a xi mokjeiín-la ìt'aà ts'e Jesús.

²⁷ ¿A 'ngaá koma takoán nga kixi títsajnaá nguixk̄on Nainá? Majìn, mìkiì 'nga koma takoán. Nga mìtsà koi kjoa-la nga kjot̄ixoma nìkitasoán. Jè-né nga mokjeiín-ná ìt'aà ts'e Jesús nga kixi síkítsajna-ná Nainá. ²⁸ K'oaá tsòya-ne ngats'ìi kjoa koi nga Nainá síkixi x̄it̄a k'e nga mokjeiín-la ìt'aà ts'e Jesús; mìtsà koi nga kjot̄ixoma ts'e Moisés síkitasòn.

²⁹ ¿A tà ts'eé xi x̄it̄a judío Nainá? ¿A mìtsà t̄ikoá ts'e xi taxk̄i x̄it̄a? Kjoa kixi-né, t̄ikoáá ts'e-né xi taxk̄i x̄it̄a xi mìtsà x̄it̄a judío. ³⁰ Nainá, tà jngoò ma xi kixi síkítsajna ngats'ìi x̄it̄a k'e nga mokjeiín-la ìt'aà ts'e Jesús. Ngàsòn síkò jñà x̄it̄a judío xi t̄jít'aà ch̄iba-la k̄o xi taxk̄i x̄it̄a xi mìkiì t̄jít'aà ch̄iba-la. ³¹ Jè kjoa nga mokjeiín-ná ìt'aà ts'e Jesucristo, ¿a t̄ichahingui-né kjoa ts'e Kjot̄ixoma? Majìn, mìtsà t̄ichahingui; t̄a saá tímajngoò-ne koni jè xá xi t̄jín-la.

4

Abraham, mé-ne kixi tsibìjna-ne nga nguixk̄on Nainá

¹ ¿Kó kixoán? ¿Mé kjoa kixi xi kisakò-la na'èn-jchá-kjìin-ná Abraham nga kixi tsibìjna nguixk̄on Nainá? ² Na'èn-jchá-ná Abraham, tsà koií-la kjoa-la nga ndaà xá xi kis'ìin nga kixi tsibìjna nguixk̄on Nainá, ok'ín-la nga jeya sìkíjna yijo-la, tanga majìn nga nguixk̄on Nainá. ³ Nga k'oaá s'ín t̄ichja Xojon jchínga-la Nainá nga tsò: “Abraham, jè-né nga kòkjeiín-la ìt'aà ts'e Nainá; k'oaá ma-ne nga kiskoétjò Nainá nga x̄it̄a kixi

kitsò-la.” ⁴ Jngoò x̄ita xi síxá, jè ton xi tjoé-la, mìtsà tà k̄jot̄jò tjoé-la; jè ch̄jì-la nga síxá. ⁵ Tanga jè x̄ita xi mìtsà xá-la ma'ñót'aà takòn, tanga mokjeiín-la it'aà ts'e Nainá xi kixi síkítsajna x̄ita xi jé t̄jín-la, x̄ita jè, Nainá k'oaá s'ín skoétjò nga x̄ita kixi tsò-la. ⁶ Jè x̄itaxá ítjòn xi ki'mì David k'oaá t̄is'ín kiùchja nga tsja s'e-la x̄ita xi Nainá kjoétjò nga x̄ita kixi tsò-la; Nainá mì t̄i kindá s'ín-ne n̄ita mé xi s'ín. ⁷ David kitsò:

Mé tà ndaà-la j̄nà x̄ita xi jye kichàat'aà-la kjoa ch'o-la

ko xi jye t̄jtsa'ma jé-la.

⁸ Mé ta ndaà-la j̄nà x̄ita xi mì t̄i kindá s'ín-ne Nainá kjoa ts'e jé-la.

⁹ Jè kjondaà jè, ¿a tà ts'eé x̄ita judío xi t̄jít'aà ch̄iba-la? ¿A xi t̄ikoáá ts'e-né xi tax̄ki x̄ita xi mìki t̄jít'aà ch̄iba-la? Jye okixan nga jè x̄ita jchínga Abraham, k'e nga kòkjeiín-la it'aà ts'e Nainá, kiskoétjò-né nga x̄ita kixi kitsò-la. ¹⁰ ¿Kós'ín komà nga kiskoétjò Nainá Abraham nga x̄ita kixi kitsò-la? ¿A k'e-né nga jye t̄jít'aà ch̄iba-la? ¿A xi k'e-né nga t̄ikj'eè t̄jít'aà ch̄iba-la? Majìn, k'e-né nga t̄ikj'eè t̄jít'aà ch̄iba-la. ¹¹ Abraham, k'e nga jye kiskoétjò Nainá nga x̄ita kixi kitsò-la, iskaán kisit'aà ch̄iba-la koni jngoò ch̄iba xi okó nga jye x̄ita kixi nga kòkjeiín-la it'aà ts'e Nainá k'e nga t̄ikj'eè t̄jít'aà ch̄iba-la. K'oaá komà-ne nga x̄ita jchínga kitsò-la Abraham ngats'ìi x̄ita xi mokjeiín-la it'aà ts'e Nainá nas'ín mìki t̄jít'aà ch̄iba-la. ¹² Abraham, t̄ikoáá x̄ita jchínga-la-né j̄nà x̄ita judío xi t̄jít'aà ch̄iba-la, tanga mìtsà tà koií kjoa-la nga t̄jít'aà ch̄iba-la, t̄ikoáá koi-né nga ya t̄jimat̄jinguì-la

nga mokjeiín-la ìt'aà ts'e Nainá, koni s'ín kòkjeiín-la Abraham k'e nga tìkj'eè tít'aà chiba-la.

¹³ Nainá, k'oaá s'ín kitsjaà-la tso'ba Abraham kò ngats'iì xita tje-la, nga jè kongatsja isò'nde; mìtsà koi kjoa-la nga Kjotíxoma kisikitasòn, jè-né nga kòkjeiín-la koni s'ín kiichja Nainá, k'oaá ma-ne nga xita kixi kitsò-la. ¹⁴ Tsà tà jñà tjoé-la kjondaà xita xi síkitasòn Kjotíxoma, tsà k'oaá s'ín tjin kjoa, nímé-là chjí-la nga mokjeiín-ná ìt'aà ts'e Nainá; tìkoaá mì-là kii kítasòn koni s'ín kitsjaà tso'ba Nainá. ¹⁵ K'e nga tjin Kjotíxoma, kjo'iín sinè-ná; tanga tsà tsjìn kjotíxoma, nímé tjin xi kotonè-la kjotíxoma.

¹⁶ Jñà xita, nga mokjeiín-la ìt'aà ts'e Nainá tjoé-la kjondaà koni s'ín kitsjaà-la tso'ba Nainá jè Abram. Nainá tsjá kjotjò kjondaà koi mé-ne nga jcha-ná nga kixi kjoa nga kítasòn ìt'aà ts'e ngats'iì tje-la Abraham. Mìtsà tà jñà tjoé-la xita judío xi tje-la Abraham nga tjin-la kjotíxoma; tìkoaá tjoé-la jñà xita xi mìtsà xita judío xi tìkoaá tje-la Abraham ma koi kjoa-la nga mokjeiín-la koni s'ín kòkjeiín-la Abraham. K'oaá ma-ne nga jè Abraham, xita jchínga-ná ma ngats'iaá ¹⁷ nga nguixkon Nainá. Koni s'ín tíchja Xojon-la Nainá nga tsò: “Kjìn naxandá xita xi jye kisìngatsja-lè xi xita jchínga tsò-lè.” Abraham, kòkjeiín-la ìt'aà ts'e Nainá xi ma-la síkjaáya-la xita xi jye k'en xi tìkoa tsjá 'én-la koni tsà jye tsitasòn kjoa xi kj'eè bitasòn.

¹⁸ Xita jchínga Abraham kòkjeiín-la koni kitsò-la Nainá; kiskoñá kjoa-né nas'ín mìkii tíjìn-la kós'ín koma nga kítasòn. K'oaá s'ín komà nga kjìn naxandá xi xita jchínga tsò-la, koni s'ín kitsjaà-la

tso'ba Nainá nga kitsò-la: “K'oaá s'ín kjìn jchán koma tje-lè.” ¹⁹ Abraham, mìkìì kjòhindaà koni s'ín kòkjeiín-la ìt'aà ts'e Nainá, nas'ín kos'ín beè-la ikon nga mì tì mé chjí-la yijo-la nga jye 'ñó xítà jchínga; jyeé kjomeè jngoò sìndo nó tjin-la; Sara xi chjoón-la, tikoá chjoón 'ndi-né; mì tì kii koma s'e-la ìxti. ²⁰ Abraham, mìtsà jò tsi'beé-la ikon koni s'ín mokjeiín-la 'én xi kitsjaà-la Nainá. Tà isaá 'ñó tsi'beé-la ikon nga ndaà kòkjeiín-la. 'Ñó jeya kisikíjna Nainá. ²¹ Abraham, nguì ndaà tíngoò ikon nga Nainá tjin-la nga'ñó nga komaá-la sikkitasòn yije kóhotjín kjoa koni s'ín kitsjaà-la tso'ba. ²² K'oaá ma-ne Nainá, k'e nga kijtseè nga ndaà mokjeiín-la Abraham, kiskoétjò nga xítà kixi kitsò-la.

²³ Mìtsà tà ìt'aà ts'e Abraham kitjei xojon jè nga Nainá kiskoétjò nga xítà kixi tsò-la. ²⁴ Tikoá ìt'aà tsaján kitjei nga Nainá skoétjò-ná nga ngàsòn xítà kixi kitso-ná koi kjoa-la nga mokjeiín-ná ìt'aà ts'e Nainá, jè xi kisikjaáya-la Na'èn-ná Jesucristo ìt'aà ts'e kjoabiyaà. ²⁵ Kjòngatsja xítà nga kisik'en Jesús jè ngatji-la jé-ná; tikoá jaáya-la mé-ne nga kixi kitsajnaá nguixkon Nainá.

5

Mé kjondaà xi sakó-ná nga jye xítà kixi tsò-ná Nainá

¹ K'e nga jye xítà kixi 'mì-ná nga mokjeiín-ná ìt'aà ts'e Nainá, jyeé 'nchán titsajnaakoá Nainá ìt'aà ts'e Na'èn-ná Jesucristo. ² Jè Cristo tsjá-ná nga s'e-ná kjondaà jè, nga mokjeiín-ná ìt'aà ts'e. Jè kjondaà jè, 'ñó ndaà tíjìn inima-ná; matsjaá-la inima-ná nga chiñà kjoá nga tikoá s'e-ná

kjoajeya-la Nainá. ³ Mìtsà tà koi kjoa nga matsja-ná, tìkoáá matsja-ná k'e nga mé kjo'in xi otojñaá. K'e nga kjo'in otojñaá, yaá sakó-ná nga'ño nga tseejta s'eén inima-ná. ⁴ K'e nga tseejta s'eén inima-ná, yaá sakó-ná nga ndaà kitjoáá; tsà nga ndaà kitjoáá, tìkoáá yaá sakó-ná nga skóña kjoa inima-ná kjondaà xi tsjá Nainá. ⁵ Jè kjoa xi chiñá-lá nga tìjngoò takoán, mìkiì masobà-ná nga mìkiì kítasòn; jè Nainá jyeé ndaà kisikíjnajiìn inima-ná kjotjòcha-la it'aà ts'e Inima Tsjeè-la Nainá xi kitsjaà-ná.

⁶ K'e nga kichóya nachrjein, Cristo, k'en ngajo-ná jña xi xita jé 'mì-ná, koií kjoa-la nga tsjin-ná nga'ño nga ma bitjokàjñaá jé-ná. ⁷ Mì-là yá xita tjín xi kiyátjì ngajo-la jngoò xita kixi, tanga tsà koi nachrjein-la tsà tjín jngoò xi ko'ño ikon nga kiyátjì ngajo-la jngoò xi 'ño ndaà xita. ⁸ Tanga jè Nainá okó-ná nga 'ño tsjakeè-ná nga jè Cristo k'en ngajo-ná, k'e nga tákó xita jé 'mì-ná. ⁹ I'ndeì nga jye xita kixi tsò-ná Nainá nga jè Cristo tsibíxteèn jní-la k'e nga k'en ngajo-ná, isaá 'ño tíkixi kjoa nga it'aà ts'e Cristo kitjokàjñaá kjo'in jè nachrjein k'e nga sùikasén kjoiti-la Nainá. ¹⁰ K'e nga kondra titsajna-lá Nainá, jè Ki'ndí-la kisikijne 'nchán kjoa k'e nga k'en. I'ndeì, k'e nga jye ndaà chibà-ná, isaá 'ño tjikixi kjoa nga kitjokàjñaá kjo'in it'aà ts'e Cristo nga jè tìjnakon-né. ¹¹ Mìtsà tà jña kjoa koi, tìkoáá 'ño matsja-ná it'aà ts'e Nainá koni s'ín kisiko-ná it'aà ts'e Nà'èn-ná Jesucristo nga it'aà ts'e Cristo 'nchán titsajnakoaá Nainá nga jye kichibàndaà-aná.

¹² K'e nga jahas'en jé isò'nde, jngoò xita xi ki'mì Adán tsohótsji jé, ikjoàn k'en; k'oaá s'ín komà nga

kjòts'ia nga biyaà yije kóhòtjín xíta, koií kjoa-la nga jé ótsji yije kóhòtjín. ¹³ K'e nga tikj'eè tjoé-la Kjotixoma Moisés, xíta xi tjín isò'nde jyeé tjín yije-la jé. Tanga mìkìl ma kindà jé-la k'e nga tsjìn kjotixoma. ¹⁴ Tjen-ne nachrjein ts'e Adán skanda ts'e Moisés, tjínè-la nga kiyá yije xíta kóhòtjín nas'in mì k'oaá tjín jé xi tsohòtsji koni kis'iìn Adán nga kisikatonè-la okixi xi kitsjaà-la Nainá. Adán, jè गया-la [Cristo] xi jskan j'ii.

¹⁵ Tanga jé xi tsohòtsji Adán, mìkìl mangàsòn koni jè kjondaà xi Nainá tsjá; nga tà jè ngatjì-la jé xi tsohòtsji xi tà jngoò xíta, k'oaá ma-ne nga kjìn xíta biyaà; tanga isaá 'ño tse kjondaà tjín-la Nainá nga kjìn xíta machikon-t'in kjotjò xi tsjá Nainá it'aà ts'e xi tà jngoò xíta xi 'mì Jesucristo. ¹⁶ Jé xi tsohòtsji xi tà jngoò xíta, mìkìl mangàsòn koni jè kjondaà xi Nainá tsjá. K'e nga kisakò jé ítjòn, Nainá kitsjaà okixi nga tsibínè-la kjo'in ngats'ii xíta. Tanga k'e nga jye kjìn jé tsohòtsji xíta, j'ii kjondaà-la Nainá nga kixi kítsajna xíta nguixkon Nainá. ¹⁷ Jè ngatjì-la jé-la xi tà jngoò xíta, tjínè-la nga kiyá xíta. Tanga i'nde, isaá 'ño tjíkixi kjoa nga it'aà ts'e xi tà jngoò xíta xi 'mì Jesucristo, tjí'nde-la nga jeya kítsajnakon jñà xíta xi 'ño tse kjondaà-la Nainá kjoé, kò xi 'ño tse kjotjò tjoé-la nga kixi kítsajna nguixkon Nainá.

¹⁸ Jè kjoa-la jé xi tsohòtsji xi tà jngoò xíta kisinè-la kjo'in ngats'ii xíta, tanga jè kjoa kixi xi kis'iìn Jesucristo tikoaá kixi kisikítsajna ngats'ii xíta nga kítsajnakon nguixkon Nainá. ¹⁹ Jè kjoa-la nga mìkìl kii'nchréñijon-la Nainá xi tà jngoò xíta xi 'mì Adán, k'oaá ma-ne nga kjìn xíta kisakò jé-la.

Tanga jè kjoa-la nga kii'nchreñijon-la Nainá xi tà jngoò xita xi 'mì Jesucristo, kjìn xita xi kixi kítsajna nga nguixkon Nainá.

²⁰ J'ii Kjotixoma-la Moisés mé-ne nga ndaà ki'ya-la nga isa 'ño isa 'ño tís'e jé; tanga k'e nga isa tse jé tísakó, isaá 'ño tse kjondaà-la Nainá j'ii.

²¹ Nga sa ítjòn, jè kjoa ts'e jé tsatixoma-la xita, mé-ne nga kisakò-la kjoabiyaà xita; tanga i'ndeji, k'oaá tís'in kàtatixoma kjondaà-la Nainá k'e nga kixi síkítsajna xita nga nguixkon Nainá mé-ne nga s'e-la kjoabinachon nita mé nachrjein-ne xi it'aà ts'e Na'èn-ná Jesucristo.

6

Mé-ne nga jè kjoa ts'e jé, mì tì mé nga'ño tjin-la nga jè kotixoma-ná

¹ ¿Kó kixoán? ¿A ndaà tjin nga kinchátsji-jé-isa mé-ne nga isa tse kjondaà tsjá-ne Nainá? ² Majìn, mì kii tì k'oa s'en-ná. Jyeé titsajnat'aàxìn-lá kjoa ts'e jé koni tsá jye k'eén xi it'aà ts'e; mì tì kii koma ya kítsajnajiìn-isaá kjoa ts'e jé. ³ ¿A mìtsà jye tíjiìn-nò k'e nga komà bautizar it'aà ts'e Cristo ngats'iaá nga tikoá ya titsakjoòkoaá k'e nga k'en? ⁴ K'e nga ma bautizar xita, k'oaá s'in ngaya-la koni tsá ya sihijiìn-t'aà-là Cristo k'e nga k'en. Koni s'in jaáya-la Cristo it'aà ts'e nga'ño-la Nainá xi 'ño jeya tjna, k'oaá tís'in mochjeén nga kos'in sijchá yijo-ná nga kijnakon xitse ijngoò k'aá.

⁵ Koni s'in titsakjoòkoaá Cristo k'e nga k'en, jná k'oaá tís'in kjoáya-ná koni s'in jaáya-la jè.

⁶ Tíjiìn-ná nga jè kjoa jchínga-ná koni s'in ki'né nga isa kjòtseé, yaá kisit'aà krò-la Cristo mé-ne

nga kàtachiya-ne nga'ño-la yijo jé-ná nga mì tì jé kjoṭíxoma-ìsa-ná. ⁷ Jngoò xita xi jye k'en, jyeé tijnandeí kjoa ts'e jé. ⁸ Nga ya k'en-koaá Cristo, mokjeiin-ná nga tikoá ya kitsajnaakoá. ⁹ 'Ya-ná k'e nga jaáya-la Cristo k'e nga k'en, nì tì jngoò nachrjein kiyá ìjngoò k'a-ne. Mì tì mé nga'ño tjin-la kjoabiyaà nga jé koṭíxoma-la. ¹⁰ K'e nga k'en Cristo, jngoò k'a k'en xi kjoa ts'e jé-ná; ì'ndeí nga ìjngoò k'a tijnakon-né koií kjoa tijnakon-ne nga jeya síkijna Nainá. ¹¹ Jño, k'oaá tìs'ín tikítsjeèn koni tsà jye k'eèn xi kjoa ts'e jé; tìtsajnakon-nò xi kjoa ts'e Nainá nga ya tìtsajnakoo Na'èn-ná Jesucristo.

¹² Koií kjoa-la, mì tì kii bìl'nde-là yijo jé-nò nga jé kjoa ts'e jé koṭíxoma-nò k'e nga kjo'ño s'ín-nò nga nìkitasòn-là kjoa xi ch'o tjin xi síjé yijo-nò. ¹³ Ki ya òngatsja yijo-nò kjoa ts'e jé nga jé jé síkjeén nga ch'o 'nè, ta saá jé Nainá tìngatsja yijo-nò koni jngoò xita xi jye jaáya-la it'aà ts'e kjobiyaà. Nainá tìngatsja yijo-nò nga kàtasíkjeén kjoa xi kixi tjin. ¹⁴ Kjoa ts'e jé, mì tì mé nga'ño tjin-la nga jé koṭíxoma-nò nga mìtsà kjoa ts'e kjoṭíxoma-la Moisés tìtsajnajñoò; kjondaà-la Nainá tìtsajnajñoò.

¹⁵ ¿Kó bixoán? ¿A ndaà tjin nga kinchátsji jé isaá nga kjondaà-la Nainá tìtsajnajñaá nga mìtsà kjoa ts'e kjoṭíxoma tìtsajnajñaá? Majìn, mìkii ndaà tjin. ¹⁶ Ndaà tjiin-nò tsà ya sìngatsja yijo-nò ts'e xita xi bitje chi'nda nga jé nìkitasòn-là, chi'nda-la komaà ts'e xita jé. Kjo'ño tjin-ne nga jé síkitasòn-là. K'oaá s'ín tjin, tsà chi'nda-la jé komaà nga jé síkitasòn-là, kiyá-nò; tanga tsà chi'nda-la Nainá komaà nga jé síkitasòn-là, kixi kitsajnaà nguixkon jé. ¹⁷ Jño, nga isa kjòtseé, k'oaá s'ín kinìkitasòn-là kjoa ts'e

jé koni tsà jngoò chî'nda, tanga i'ndeï, ndaà chjì-là Nainá nga kò inima-nò ndaà nìkitasòn koni s'ín nguì ndaà tjín 'én kixi xi kis'enojmi-nò. ¹⁸ I'ndeï jyeé titsajnandeï-là kjoa ts'e jé; chî'nda ts'e kjoakixi-nò; tjínè-nò nga sikitasòn koni s'ín síjé kjoakixi. ¹⁹ Koi 'én tìchjàkò-nò xi mìtsà 'in chja koií kjoa-là nga indaà tjín takòn; mìkì ndaà machiya-nò kjoa ts'e Nainá. Koni s'ín ki'nè nga isa kjòtseé nga ya kinìngatsja yijo-nò it'aa ts'e ngats'iì kjoach'o xi tjín nga jè tsatíxoma-nò koni xita chî'nda; i'ndeï k'oaá tis'ín tingatsja yijo-nò it'aa ts'e kjoa kixi mé-ne jè kjoa kixi kàtatíxoma-nò koni chî'nda xi tsjeè títajna nga nguixkòn Nainá.

²⁰ K'e nga kjoa ts'e chî'nda-là jé titsajnajñoò, mìkì títanìkitasòn-là kjoakixi-là Nainá. ²¹ Tanga, ¿mé xi kisakò-nò kjoa ts'e jé? I'ndeï tà masobà-nò kjoa koi; tà yaá fiko-ná ñanda tjín kjoabiyaà. ²² I'ndeï nga jye títajnandeï-là xi kjoa ts'e jé, chî'nda-là Nainá ma; kjondaà xi sakó-nò jè-né nga tsjeè títajnaà nga nguixkòn Nainá. Xi fehet'aà-ne, s'e-nò kjoabinachon nita mé nachrjein-ne. ²³ Chjí xi tjín-là kjoa ts'e jé, kjoabiyaà-né. Tanga kjotjò xi tsjá Nainá, kjoabinachon-né nita mé nachrjein-ne nga ya títajna kjoaá Cristo Jesús xi Na'èn-ná ma.

7

Kó s'ín ma fehet'aà nga'ño-là jè kjotíxoma

¹ Jño, xi 'ndseeé chibà, tìchjàkò-nò xi jyeé tíjìn-nò kós'ín tíchja kjotíxoma; 'ya-nò nga tjín-là nga'ño jè kjotíxoma kós'ín otíxoma-là xita k'e nga títajnakon-isa skanda k'e nga kiyá. ² K'oaá ngayalà jngoò chjoón xi tjín-là x'in, k'oaá tsò

kjotíxoma nga mìkìl koma tsjín xíkjín k'e nga tákó títajnakon ingajò. Tanga tsà jè x'in kiyá, jè chjoón, jye tijnandeí it'aà ts'e kjotíxoma xi ts'e kjoabixan. ³Jè chjoón, k'e nga tsà tákó tijnakon x'in-la, tsà kj'eí x'in kixan-ko, kjoa chijnguí tís'in; tanga tsà jye k'en x'in-la, jè chjoón, jyeé tijnandeí xi kjoa ts'e kjotíxoma jè; komaá kixan-ko ìjngoò k'a-ne xi kj'eí x'in. Mì tì kjoa chijnguí tís'in-ne.

⁴Jñò ndí 'ndsè, k'e nga k'en-kjoòkòò Cristo, yaá k'en it'aà ts'e nga'ñó-la kjotíxoma, mé-ne nga ya kinókjoa-nò it'aà ts'e Cristo xi jye jaáya-la ts'e kjoabiyaà nga k'oas'in kàta'ya-la it'aà tsaján jè kjondaà xi sasén-la Nainá. ⁵K'e nga tisa ya tjaajñaá kjoa xi tjin isò'nde, jè kjotíxoma tsibít'in-ná mé-ne nga jña kjoa ch'o xi síjé yijo-ná, isa 'ñó ch'o kisixájiin yijo-ná; k'oaá komà-ne nga kisakò-ná kjoabiyaà. ⁶Tanga j'ndeí jyeé titsajnandeí-lá kjoa ts'e kjotíxoma. Jyeé k'eén it'aà ts'e kjoa xi bít'aà'ñó-ná, mé-ne nga koma sixá-lá Nainá xi kjoa xitse koni s'in okóya-ná Inima Tsjeè-la Nainá. Mìtsà k'oas'in sixá-lá koni s'in tjin kjoa jchínga xi tjit'aà xojon.

⁷¿Kó kixoán xi kjoa ts'e kjotíxoma? ¿A ch'o tjin? ¿A kjoa ts'e jé-né? Majin, ndaà tjin. Tanga 'an, tsà mìkìl kijtseèxkoan kjoa ts'e kjotíxoma, tikoáá mì-là kii kijtseè kjoa ts'e jé. Mì-là kii kisijin-na nga mìkìl ndaà tjin nga 'an fahajin-na tsojmì xi mìtsà ts'an, tsà jè kjotíxoma mì k'oaá s'in bénojmi nga tsò: “Kì jì nìkjaajin tsojmì xi mìtsà tsiji.” ⁸Kjoa ts'e jé, yaá kisakò-la nga'ñó it'aà ts'e kjotíxoma; k'oaá komà-ne nga isa 'ñó jahajin-na tsojmì xi mìtsà ts'an. Tanga tsà tsjin kjotíxoma, tsjin-la nga'ñó kjoa ts'e jé. ⁹K'e

nga sa kjòtseé, kj'eè kii bexkoan kjotíxoma. Tanga k'e nga kijtseèxkoan kjotíxoma, kjoa ts'e jé, ìsaá ndaà kis'e-la nga'ño; kjoabiyaà kisakò-na. ¹⁰ Kjoa ts'e kjotíxoma, tjínè-la nga kjoabinachon tsjá-na, tanga tà saá kjoa biyaà kitsjaà-na. ¹¹ Kjoa ts'e jé, yaá kisakò-la nga'ño it'aà ts'e kjotíxoma nga kiskoònachan-na, k'oa kisik'en-na.

¹² K'oaá s'ín tjín nga jé Kjotíxoma, tsjeè-né; koni s'ín otíxoma jña 'én xi tjit'aà, tsjeè-né, kixi-né, koa ndaà-né. ¹³ ¿Kó bixón? ¿A jé kjoa ts'e kjotíxoma xi ndaà tjín xi kisik'en-na? Majìn, mìtsà koi kjoa-la. Kjoa ts'e jé-né. K'oaá s'ín ki'ya-la nga kixi kjoa nga jé-né. It'aà ts'e kjotíxoma xi ndaà tjín, jé kjoa ts'e jé kisakò-la nga'ño nga kisik'en-na, mé-ne nga ki'ya-la it'aà ts'e kjotíxoma nga 'ño ch'o tjín xi kjoa ts'e jé.

Kó tsò xitá xi otíxoma-la kjoa ts'e jé

¹⁴ Kjoa ts'e kjotíxoma, 'ya-ná nga kjohítsjeèn ts'e Inima Tsjeè-la Nainá; tanga 'an, yijo jé tsohoya; yijo-na yaá kjòngatsja kjoa ts'e jé nga jé otíxoma-na.

¹⁵ Mikiì fíya-na mé kjoa xi s'iaàn. Kjoa xi ndaà tjín xi mejèn-na nga s'iaàn mikiì koa s'iaàn. Tà saá jña kjoa xi mikiì sasén-na sikitasoàn. ¹⁶ K'e nga k'oa s'iaàn jña kjoa xi mikiì mejèn-na, k'oaá xan nga tjiixi kjoa nga ndaà tjín koni s'ín tíchja kjotíxoma.

¹⁷ K'e nga k'oa s'iaàn nga otsjià jé, mìtsà 'an xi k'oa s'iaàn, jé kjoa ts'e jé xi tíjìn-na bí't'in-na. ¹⁸ 'An xi xitá isò'nde 'mì-na, be-ná nga mikiì ndaà tjín kjoa xi tíjìn yijo-na. Mejèn-na nga ndaà s'iaàn, tanga mikiì sakó-na kó s'ín s'iaàn kjoa xi ndaà tjín. ¹⁹ K'e nga mejèn-na ndaà s'iaàn, mikiì sikitasoàn; tà saá koi sikitasoàn kjoa xi ch'o tjín xi majìn-na nga koa

s'iaàn. ²⁰ K'e nga k'oas'ín sikitasoàn kjoa xi ch'o tjin xi majin-na nga koa s'iaàn, mitsà 'an xi k'oa s'iaàn, jè kjoa ts'e jé xi tijnajin-na xi k'oas'ín.

²¹ Jngoò kjoa matsji-na nas'ín mejèn-na nga ndaà s'iaàn, tà saá tà koi sakó-na kjoa xi ch'o tjin.

²² Xi jjin inima-na matsja-na it'aà ts'e Kjotixoma-la Nainá. ²³ Tanga tjin jngoò kjoa xi tísxájin yijo-na xi mìkiì tsjá'nde-na nga ndaà s'iaàn; jè kjoa ts'e jé kjaán-kjoò kjohitsjeèn-na xi mejèn-la nga ndaà s'iaàn. Kjoa ts'e jé xi tísxájin yijo-na síkijne-na nga ch'o s'iaàn.

²⁴ Ima xó-na 'an; ¿yá xi síkijnandeí-na it'aà ts'e yijo jé-na xi kjoabiyaà tjin-la? ²⁵ Ndaà chjí-la Nainá nga it'aà ts'e Na'èn-ná Jesucristo síkijnandeí-ná kjoa ts'e jé.

Nga jñà 'én xi kotixan-nò nga 'an, ya jjin kjohitsjeèn-na mejèn-na sikitasoàn kjotixoma-la Nainá, tanga ya jjin yijo jé-na, tà saá kjoa ts'e jé sikitasoàn.

8

Mé kjondaà xi sakó-ná k'e nga k'oas'ín titsanjchá yijo-ná koni s'ín mejèn-la Inima Tsjeè-la Nainá

¹ Tanga j'ndeí, jñà xita xi ya titsajnakjoòko Cristo, mì ti mé kjo'in sinè-la, jñà xita xi mì k'oaá s'ín nchisíchá yijo-la koni tjin jé xi síjé yijo-la; tà saá k'oaá s'ín nchisíchá yijo-la koni s'ín mejèn-la Inima Tsjeè-la Nainá. ² Jè nga'ño-la Inima Tsjeè-la Nainá xi síkítsajnakon-ná nga ya titsajnakjoòkoaá Cristo; ko tijè-ne nga'ño xi kisikítsajnandeí-ná it'aà ts'e nga'ño-la kjoa ts'e jé ko it'aà ts'e kjoabiyaà. ³ Kjotixoma ts'e Moisés

mìkiì kichìkjoa-là nga síkítsajñandejì-ná it'aà ts'e jé, nga tsjìn-là nga'ńó, koi kjoa-là nga jè yijo-ná síjé jé xi tjín isò'nde. Tanga Nainá kichìkjoaá-là nga kisikasén Ki'ndí-là koni jngoò xi xita isò'nde xi yijo kis'e-là koni jńá xi xita jé 'mì-ná. Ki'ndí-là kitsjaà kjotjò yijo-là nga k'en xi kjoa ts'e jé-ná. Nainá k'oaá s'ín kis'iìn nga jngoò k'a kisìkجهet'aà kjoa ts'e jé xi tjín-là yijo-ná. ⁴ Nainá k'oaá s'ín kis'iìn mé-ne nga it'aà tsaján kátitasòn-ne jè kjoa kixi xi ts'e kjotixoma, jńá xi mì k'oaá s'ín titsañjchá yijo-ná koni tjín jé xi síjé yijo-ná, nga k'oas'ín titsañjchá yijo-ná koni s'ín mejèn-là Inima Tsjeè-là Nainá.

⁵ Jńá xita xi k'oa s'ín koni tjín xi síjé yijo-là, k'oaá tjín kjoa xi nchisíkítsjeèn; tanga jńá xi k'oa s'ín koni s'ín tjín xi síjé Inima Tsjeè-là Nainá, k'oaá tjín kjoa xi nchisíkítsjeèn. ⁶ Jńá xita xi k'oas'ín nchisíkítsjeèn koni tjín xi mejèn-là yijo-là, kjoabiyaà tjín-là. Tanga jńá xita xi k'oas'ín nchisíkítsjeèn koni s'ín mejèn-là Inima Tsjeè-là Nainá, tjín-là kjoabinachon kò kjoa'nchán. ⁷ Xita xi tà koi kjoa nchisíkítsjeèn koni tjín kjoa ch'o xi síjé yijo-là, kondra ts'e Nainá-né koi kjoa-là nga mìkiì síkitasòn kò mìkiì chíkjoa-là nga síkitasòn kjotixoma-là Nainá. ⁸ Jńá xita xi k'oas'ín s'ín koni tjín xi síjé yijo-là, mìkiì ma-là s'ín koni s'ín sasén-là Nainá.

⁹ Tanga jńò, mì tì k'oaá 'nè-nò koni tjín xi síjé yijo-nò; k'oaá s'ín titsa'nè koni tjín xi síjé Inima Tsjeè-là Nainá, nga jè tijnajììn inima tsajòn Inima Tsjeè-là Nainá. Jńá xita xi tsjìn-là Inima Tsjeè-là Nainá xi kitsjaà Cristo, mìtsà xita ts'e Cristo. ¹⁰ Tanga tsà yaá tijnajììn inima tsajòn Cristo, inima tsajòn tijnakon-né nga xita kixi

'mì-nò nga nguixkòn Nainá, nas'ín k'oas'ín tjinè-la nga kiyá yijo-nò xi kjoa ts'e jé. ¹¹ Jè Nainá xi kisikjaáya-la Jesucristo it'aà ts'e kjoabiyaà, tsà ya tijnajiìn inima-nò jè Inima Tsjeè-la, k'oaá tis'ín siikítsajnakon ijngoò k'a yijo-nò xi kjoa ts'e kjoabiyaà it'aà ts'e nga'ño-la Inima Tsjeè-la Nainá xi tijnajiìn inima tsajòn.

¹² K'oaá ma-ne, jña xi 'ndseé chibá, tjna jngoò xi tjinè-ná nga sikitasòn-lá, tanga mitsà jè yijo-ná sikitasòn-lá; mì tì kù k'oas'ín s'en-ná koni tjin kjoa ch'o xi síjé yijo-ná. ¹³ Tsà tákó k'oaá s'ín s'een nga ya onguít'aà-là kjoa xi ch'o mejèn-la yijo-nò, kiyá-nò. Tanga tsà koj'nde-là Inima Tsjeè-la Nainá nga jngoò k'a siikijne-la kjoa xi ch'o mejèn-la yijo-nò, kitsajnakon-nò.

¹⁴ Jña xita xi jè Inima Tsjeè-la Nainá okó-la ndiyá, jña-né xi ixti-la Nainá 'mì. ¹⁵ Jè Inima Tsjeè xi kitsjaà-nò Nainá mitsà taxki inima ima xi kjo'ño s'ín-nò koni jngoò chi'nda xi ts'e jé nga ma-la bíxkón-nò; ta saá jè Inima xi kitsjaà-ná Nainá skoétjò-ná nga ixti-la komaá, tijè-ne Inima Tsjeè-la Nainá bénojmiya-ná nga ma nokjoà-lá Nainá nga Ndí Apa 'mì-lá. ¹⁶ Jè Inima Tsjeè-la Nainá tsjá kixi-la 'én inima tsaján nga ixti-la Nainá 'mì-ná. ¹⁷ K'e nga jye ixti-la maá, tikoáá tsaján-ná kjo'tjò-la Nainá xi jye k'oas'ín kitsjaà tso'ba nga tsjá-ná; tañaá tjoékjoè-ná kò Cristo nga tikoá kò jè titsanikjiaán kjo'in mé-ne nga jeya kitsajnakò-ná Cristo.

¹⁸ 'An, k'oaá xan nga kixi kjoa, koni tjin kjo'in xi titsanikjiaán i'ndeì mikiì mangásòn koni tjin kjoajeya-la Nainá xi s'e-ná k'e nga koma iskan.

¹⁹ Jña tsojmì xi Nainá tsibíndaà, 'ño nchikoña kjoa

nga mejèn-là skoe nachrjein k'e nga Nainá jngoò k'a ndaà kòkò kó kjoàn xi ixti-là ma. ²⁰ Jñà tsojmì xi tsibíndaà Nainá, jngoò k'a its'oòn-jiin koni s'ín tjínè-là nga kochjeén nga sa ítjòn; mìtsà kjotsja ts'e isò'nde nga k'oas'ín komàt'in; koi-né nga jè Nainá k'oaá s'ín kiskoòsòn-là; tanga i'ndeì jñà xi tsibíndaà Nainá nchikoñaá-là ²¹ nga kjoìi nachrjein k'e nga tikoà kitsajnandeìí xi tsibíndaà Nainá nga mì tì kù kits'ón-jiin-ne; Nainá jeya sikkitsajnandeìí ijngoò k'a-ne koni s'ín sikkò ixti-là. ²² 'Ya-ná ngats'ìi xi Nainá tsibíndaà, skanda i'ndeì, nchitsiné-né, kjo'in nchisíkjeiín koni jngoò chjoón xi ki'ndí tí'beé. ²³ Mìtsà tà koi xi tjín isò'nde xi tsiné; tikoáá jñà xi jye tjín-ná Inìma Tsjeè-là Nainá koni jngoò kjondaà xi tjen kitjoé ítjòn-ná, tikoáá tsiné-ná nga kjo'in titsanìkjaáan nga titsachiñá-lá nga 'nó mejèn-ná nga skoétjò-ná Nainá nga jngoò k'a ya kitsajnakoaá koni ixti-là maá; yijo-ná kíjnandeìí-ne it'aà ts'e kjoà xi síkits'ón-ná. ²⁴ Nga jye titsajnandiaá, i'ndeì jè titsachiñá-lá nga jngoò k'a kàtitasòn. Tanga tsà tsejèn tíjna xi chiñá-lá mìkì ma chiñá-lá. ¿Yá xi koña-là xi tsejèn tíjna? ²⁵ Tanga tsà jè chíña-lá xi mìkì tsejèn tíjna, tafì tafì chíñakjoà-lá. ²⁶ K'oaá tis'ín s'ín jè Inìma Tsjeè-là Nainá k'e nga indaàjiin tjín inìma-ná síchját'aà-ná. K'e nga mìkì ma-ná kó s'ín sijét'aà-lá Nainá k'e nga bìtsi'ba-lá, tìjè-ne Inìma Tsjeè-là Nainá bìtsi'batjì-ná, nímé 'én xi tsejèn chja, nì itsé fiya-ná kó tsòya-ne. ²⁷ Jè Nainá xi ma-là bíxkejìin inìma-ná, tíjìin-là mé xi tìbìtsjeèn-là jè Inìma Tsjeè-là. K'e nga bìtsi'batjì xitá tsjeè-là Nainá k'oaá s'ín síjét'aà-là koni s'ín mejèn-là Nainá.

Nimé xi koma kochrjet'aàxìn-ná kjoatjòcha-la Nainá xi jye tjín-ná it'aà ts'e Cristo Jesús

²⁸ Tíjìn-ná nga it'aà ts'e jñà xita xi tjòkèè beè Nainá, ngats'iì kjoa xi mat'in, Nainá k'oaá s'ín síkjeén xi kjondaà ts'e xita. K'oaá s'ín síko jñà xita xi xó jè kiichja-la koni s'ín mejèn-la, ²⁹ jñà xita xi jye tíjìn-la nga tisa tàts'en-la kjoa nga ixti-la koma; tikoáá k'oaá s'ín kiskoòsòn-la nga ngàsòn kjoàn koma koni kji Ki'ndí-la mé-ne nga jè Cristo Ki'ndítjòn koma koa kjin koma xita xíkjin xi 'ndse. ³⁰ Nainá nga k'oas'ín kiskoòsòn-la it'aà ts'e xita koi, tikoáá xó kiichja-la, jñà xi xó kiichja-la tikoáá kixí kisiíkítsajna, jñà xi kixí kisiíkítsajna tikoáá jeya kisiíkítsajna.

³¹ ¿Mé xi kixoán it'aà ts'e kjoa koi? Nga Nainá tíjnako-ná, nijngoò xita kondra-ná síkijne-ná.

³² Nainá mìkìì 'on komà-la, nga kitsjaà kjotjò Ki'ndí-la it'aà tsaján ngats'iaá skanda kjoabiyaà. ¿A mìtsà tikoá tsjá kjotjò-ná ngayije nga ko Cristo?

³³ ¿Yá xi koma kohòngui-ná jñà xi Nainá xó jaàjìn-ná? Mì yá xi koma kohòngui-ná nga jé Nainá jye kixí kisiíkítsajna-ná. ³⁴ ¿Yá xi koiì'nè-ná kjo'in?

Nga jé Cristo Jesús k'en ngajo-ná, tikoá jaáya-la kjoa ts'e kjoabiyaà. Yaá tíjna it'aà kixí-la Nainá nga tíbítì'batjì-ná. ³⁵ ¿Yá xi kochrjet'aàxìn-ná kjoatjòcha-la Cristo?

¿A kjo'in-né? ¿O xi kjoaba-ne? ¿O xi jè-né nga ongatjingui-ná xita? ¿O xi kjoa ts'e kjinchrá-ne? ¿O xi koií-né nga tsjìn-ná nikje xi chíkjá? ¿O xi jè kjoa xi xkón tjín? ¿O xi jè kjoa biyaà nga xita sík'en-ná? Majìn, nimé kjoa-ne. ³⁶ K'oaá s'ín tíchja Xojòn-la Nainá nga tsò:

Xi kjoa tsiji kjit'aà nachrjein tjín kjoxkón nga

kijá-jen,
k'oaá s'ín tíyatakòn-najen koni orrè xi tíjnandaà nga
kijá.

³⁷ Tanga it'aà ts'e ngats'iì kjoa koi, jye tsato
titsanikijne-lá xi it'aà ts'e Cristo xi kjòtsjakeè-ná.

³⁸ K'oaá s'ín tíngoò takoán nga nijngoò kjoa xi
koma kochrjet'aaxìn-ná xi kjoatjòcha-la Nainá, ni
jè kjoa biyaà, ni kjoabinachon, ni àkjale, ni jñà
nga'ño xi tjin isò'nde ni jñà xi tjin jjiin isén, ni jñà
kjoa xi tjin nachrjein i'nde, ni jñà kjoa xi koma
nachrjein xi sa nchrobá, ³⁹ ni jè xi isa 'nga, ni jè xi
isa nanga, nita mé tsojmi xi Nainá tsibíndaà, nimé
xi koma kochrjet'aaxìn-ná kjoatjòcha-la Nainá xi
jye tjin-ná it'aà ts'e Cristo Jesús xi Na'èn-ná.

9

*Mé-ne mìkì ijchòtjingui-la kjoa kixi-la Nainá jñà
xita Israel xi xó jaajìin-ne*

¹ Okixi xi xan it'aà ts'e Cristo; mì 'én ndiso chjà;
jè Inimà Tsjeè-la Nainá síkichiya-la kjohítsjeèn-na
nga tsjá 'én it'aà ts'an, ² nga kjit'aà nachrjein ba
tjin-na koa 'on ma-la inimà-na, ³ it'aà ts'e jñà xita
'ndsè xi xinguiàa ma koi-né nga 'ño matsjake.
'Ñó mejèn-na nga kàtasakó-la kjondaà. Skanda
komaá-là kòsit'aaxìn-la Cristo tsà k'oas'ín sakò-la
kjondaà jñà xita xinguiàa xi ts'e naxandá Israel,
tanga mìkì tji'nde-na nga kòs'ín s'iaàn. ⁴ Nga jñà
xita Israel, jè Nainá kiskoétjò nga ixti-la ma, ko
yaá ki'ya-la kjoajeya-la Nainá, ko kitjoé-la jñà
kjoa xi tsibíndaajìin-ko, tikoà kitjoé-la kjotíxoma-la
Moisés, ko kitjoé-la okixi kòs'ín skoexkón Nainá,
ko kitjoé-la 'én koni s'ín kitsjaà-la tso'ba Nainá.

⁵ Jñà x̄ita Israel yaá inchrobàt'aà-ne ts'e xi 'ñó x̄ita jchínga kjiin xi Nainá xó jaàjiin-ne. Jè Cristo [xi xó kisikasén-ne Nainá] nga x̄ita isò'nde komà, yaá inchrobàt'aà-ne it'aà ts'e x̄ita jchínga koi. Jè Cristo xi Nainá; jè otíxoma yije-la kjoa; jeya kàtìjna n̄ita kjé-ne. K'oas'ín kàtama.

⁶ [Nga mìtsà mokjeiín-la ngats'iì x̄ita Israel], mìtsà koi kjoa-la nga jè 'én-la Nainá mìkì bitasòn. Koi-né nga it'aà ts'e Nainá, mìtsà ngats'iì x̄ita xi ya nchrobát'aà-ne tje-la Israel nga nguì kixi kjoa nga ya chja-ne. ⁷ Nas'ín ya tje-la it'aà ts'e Abraham, mìtsà ngats'iì nga kitjoé-la kjondaà nga ixti-la ma. Nga k'oaa tsò Xojon-la Nainá: “Jñà x̄ita tje-lè, yaá kjinchrobà-ne it'aà ts'e Isaac.” ⁸ Kjoa koi, k'oaa tsòya-ne, nga jñà ixti-la Nainá, mìtsà jè xi chjì-la yá ts'e tje xi nchrobát'aà-ne. Ta jñà-né xi ixti-la Nainá ma jñà xi jye k'oas'ín kitsjaà tso'ba Nainá nga ixti-la koma. Tà jñá-né xi k'oas'ín oxkit'aà nga kixi kjoa nga nguì tje-la Abraham ma. ⁹ Nga jè 'én xi Nainá kitsjaà-la tso'ba Abraham, k'oaa tsò: “Jè nó xi sa nchrobá kjoíí ìjngò k'a-na; jè Sara, ki'ndí s'e jngò-la.”

¹⁰ Mìtsà ta jñá kjoa koi xi komà. Tikoaa jè Rebeca kis'e-la ixti'ño xi ts'e Isaac, jè xi x̄ita jchínga-ná ma. ¹¹ Nainá k'oaa s'ín kitsjaà tso'ba k'e nga tikj'eè ts'iin jñà ixti'ño nga tikj'eè kii 'ya-la mé kjoa xi s'iin, a jè xi ndaà tjín, o jè xi mìkì ndaà tjín. K'oaa s'ín kjòkixi nga Nainá tjí'nde-la nga kjoaájiin x̄ita koni s'ín jye tjíndaà-la nga kichja-la jñà x̄ita xi jè mejèn-la. Mìtsà kindà s'ín mé xi jye kis'iin x̄ita. ¹² Nainá k'oaa kitsò-la Rebeca: “Jè ti-lè xi jts'ín ítjòn, chì'nda-lá koma jè xi iskan jts'ín.” ¹³ K'oaa s'ín tíchja Xojon-la

Nainá nga tsò: “Jè Jacob kjòtsjakeè-ná, kò jè Esau kòjtikeè-ná.”

¹⁴ ¿Mé xi kixoán? Nainá, ¿a mìtsà kjoa kixi xi s'ín? Majìn, mì k'oaá s'ín tjín. ¹⁵ Nainá k'oaá kitsò-la Moisés: “Kohimakeè-ná xi 'an mejèn-na nga kohimakeè, skoehima-ná jè xi mejèn-na nga skoehima.” ¹⁶ K'oaá s'ín tjín kjoa koi, mìtsà koi nga jñá mejèn-ná nga s'e-ná, nì mìtsà koi nga 'ño binchaàtsjiaá; jè Nainá tsjá-la kjondaà-la jñà xita xi jè mejèn-la mahimakeè. ¹⁷ K'oaá s'ín tíchja Xojon-la Nainá nga kitsò-la Faraón: “Koií k'oas'ín kisikíjna-lè nga xitaxá tijni ya naxandá Egipto mé-ne nga it'aà tsiji kokoaà nga'ño-na tikoá skoexkon-na xita nga tíjtsa isò'nde.” ¹⁸ K'oaá s'ín s'ín Nainá, tjín-la kjohimatakòn it'aà ts'e xita xi jè mejèn-la; tikoá ma-la sítájaajìlìn inima-la xita xi jè mejèn-la nga kátasítájaajìlìn inima-la.

¹⁹ Tanga tsà jì k'oa k'oín-ná: “Tsà k'oas'ín s'ín Nainá, ¿mé-ne jé bínè-la jñà xita?, nga nì yá xita xi koma kondra kjoj-la koni s'ín mejèn-la jè.” ²⁰ Tanga jì, xi taxki xita-né, ¿yá-né jì, nga Nainá otìkjoðkoií? Jngoð tíjì xi xó kisindaà-ne, ¿a komaá kitsò-la jè xi tsibindaà: “Mé-ne k'oas'ín tsibindaà-ná?” ²¹ ¿A mì tíj'nde-la jè xi ma-la bindaà tíjì ni'nde nga tíjè-ne ndási koìndaà jngoð-ne tíjì xi tà k'e mochjeén k'e nga tjín s'eí koá koìndaà jngoð xi nàchrjein nchijòn mochjeén?

²² Tsà Nainá mejèn-la tsakó kjoajti-la kò nga'ño-la, ¿a ch'o tjín nga kiskoðña kjoa it'aà ts'e xita xi tjoé-la kjo'in kò xi tjínè-la nga kjoehesòn? ²³ Mìtsà ch'o tjín; nga koií k'oas'ín kis'ìin-ne mé-ne nga ma tsakó kjoajeya-la xi it'aà tsaján

nga kjòhimatekè-ná. Nga jè tsibítsajnánda-ná skanda t̄isa kjòtseé, mé-ne t̄ikoa s'e-ná kjoajeya-la.

²⁴ Nainá k'oaá s'ín xó kiichja-ná. Tjín x̄ita xi ya itjokàjìn ts'e x̄ita judío; t̄ikoaá tjín x̄ita xi ya itjokàjìn ts'e xi taxki x̄ita xi mìtsà x̄ita judío.

²⁵ K'oaá s'ín tíchja xojon-la Oseas x̄ita xi kiichja ngajo-la Nainá nga tsò:

Jè xi mìtsà naxandá-na ma nga sa ítjòn, naxandá ts'aán koma;

jè xi mì t̄òkèè kijtseè nga sa ítjòn, t̄òkèè skoeè.

²⁶ Ti ya-ne i'nde ñánda oki'mì-nò:

“Mìtsà naxandá ts'an xan-nò”,

“ixti-la Nainá xi t̄jnakon” k'oín-nò.

²⁷ Isaías, x̄ita xi kiichjaya ngajo-la Nainá, k'oaá t̄i tsò it'aà ts'e naxandá Israel: “Nas'ín kjín jchán ma-ne ixti-la koni tso mì ts'e ndáchikon, tà chiba ma-ne xi k̄itjokàjìn kjo'in. ²⁸ Nga jè Na'èn-ná n̄itoón s̄ikitasòn jè kjoakixi-la xi jye jè kitsjaà koni s'ín t̄jínè-la j̄nà x̄ita nga t̄jtsa isò'nde.” ²⁹ Koni s'ín kitsò Isaías nga t̄isa ítjòn:

Jè Na'èn-ná, xi tse nga'ño t̄jín-la,

tsà mìkìl k̄is̄ikiningui chiba-ne tje-ná,

jyeé-la k̄is̄ikjehesòn yije-ná

koni k̄is̄ikò naxandá Sodoma kò naxandá Gomorra.

³⁰ ¿Mé xi kixoán? J̄nà xi mìtsà x̄ita judío, xi mìkìl f̄it̄jingui-la kjoa kixi, i'nde, jyeé x̄ita kixi-né nga nguixkon Nainá tà koí kjoa-la nga mokjeiín-la it'aà ts'e Nainá. ³¹ Tanga j̄nà x̄ita Israel xi f̄it̄jingui-la K̄jotíxoma-la Moisés nga nchihótsji nga kixi k̄itsajna nguixkon Nainá mìkìl ijchòt̄jingui-la.

³² ¿Mé-ne nga k'oas'ín komà-ne? Koí kjoa-la nga mìkìl mokjeiín-la it'aà ts'e Nainá. Tà k'oaá s'ín

'ñó tsohót'aàhikon nga ndaà tjín kjoa xi kis'iìn it'aà ts'e Kjoṭíxoma. K'oaá ma-ne [k'e nga j'ii Cristo] yaá kisingui koni jngoò Ndajo xi kijnahikòn. ³³ Xojon-la Nainá k'oaá s'ín tíhja [it'aà ts'e Cristo] nga tsò:

Ya nindoò Sión kijnaá jngoaá ndajo xi kijnahikòn,
jngoò Ndajo xi satíngui xita,
tanga jè xi kokeiín-la it'aà ts'e Ndajo jè mìkii
kosobà-la.

10

Mé xi s'eén nga kitsajnadeií-ná xi kjoa ts'e jé-ná nga kixi kitsajnaá nguixkon Nainá

¹ Jñò ndí 'ndsè, xi nguì okixi, koií xi 'ñó mejèn-la inima-na ko xi 'ñó s'ijét'aà-la Nainá it'aà ts'e naxandá Israel, nga kàtitsajnadeií kjoa ts'e jé-la. ² An be kixi-ná nga 'ñó mejèn-la nga ndaà skoexkón Nainá jñà xita Israel, tanga mìkii mangàsòn kjohítsjeèn-la koni s'ín tjín jè kjohítsjeèn xi nguì kixi tjín. ³ Nga mìkii fahas'en-jìin-la nga tà jngoò jè Nainá xi ma-la kixi síkítsajna xita. Tà jè xi mejèn-la nga tà jñà kixi síkítsajna yijo-la. Majìn-la kjoé xi okixi-la Nainá xi ma-la kixi síkítsajna-ná. ⁴ Nga jè Cristo kisikjehet'aà kjoa ts'e kjoṭíxoma mé-ne nga s'e-la kjoa kixi ngats'ii xita xi mokjeiín-la it'aà ts'e Nainá.

⁵ Jè Moisés, k'oaá s'ín kiskii it'aà ts'e xita xi mejèn-la kixi kítsajna it'aà ts'e kjoṭíxoma nga tsò: “Jè xita xi síkítasòn kjoṭíxoma, it'aà ts'eé kjoṭíxoma kijnakon-ne.” ⁶ Tanga it'aà ts'e xita xi kixi kítsajna k'e nga mokjeiín-la, k'oaá tsò: “Kì k'oaá tsò inima-lè: ¿Yá xi kjimijìn ngajmii?” (Én koi

tsòyaá-ne nga mejèn-là kjinchrobàjen-ko Cristo.)
 7 Ko, kì k'oaá tsò inima-lè: “¿Yá xi ma koiis'en-jiin ì'nde ñánda nchisíkjeiín kjo'in jñà mik'en?” (Én koi tsòyaá-ne nga mejèn-là skímiì'nga ìjngòò k'a-ne Cristo ya jjiin-là mik'en.) 8 Tanga, ¿kó tsò-ìsa 'én-là Moisés? Tsò-ne: “Chrañat'aà tìjna-lè jè 'én, yaá tìjna'a ndsoboì, yaá tìjnajiin inima-lè.” K'oaá tsò 'én xi 'an chjaya xi mochjeén nga kòkjeiín-ná.
 9 Tsà ndsoboì kènojmi-ne nga Jesucristo, jè xi Na'èn-ná, koa tsà kò inima-lè kòkjeiín-lè nga Nainá kisìkjaáya-là it'aà ts'e kjoabiyaà, kijnandeji-né xi kjoa ts'e jé-lè. 10 Nga koò inima-ná mokjeiín-ná mé-ne nga kixi kítsajnaá nguixkon Nainá tìkoa koò ndsobaá bènojmiá nga Jesucristo, jè xi Na'èn-ná, mé-ne nga koma kítsajnandeji-ná xi kjoa ts'e jé-ná.

11 K'oas'ín tíchja Xojon-là Nainá nga tsò: “Ngats'ii xi kòkjeiín-là it'aà ts'e Cristo mìkì kòsobà-la.”
 12 Jñà xita judío ko xi mìtsà xita judío, tà ngàsòn-né xi it'aà ts'e Nainá; nga tije-ne Cristo xi Na'èn tsò-là ngats'ii xita. Jè kjondaà xi 'ño tse tjin-là Cristo, jè tsjá-là ngats'ii xita xi chjat'aà-la. 13 Nga k'oaá tì tsò Xojon-là Nainá: “Ngats'ii xita xi kichjat'aà-là Na'èn-ná, kítsajnandeji-né xi kjoa ts'e jé-la.” 14 Tanga mìkì koma kichjat'aà-là Cristo jè xita xi kj'eè kì mokjeiín-là. Ko mìkì kòkjeiín-là xita xi kj'eè mé 'én 'nchré it'aà ts'e Cristo. Koa mìkì koma kji'nchré xita tsà mì yá xita tjin xi kènojmi-là it'aà ts'e Cristo. 15 Koa jè xita xi kènojmi 'én, mìkì koma sìxá tsà mì yá xi sìikasén. K'oas'ín tíjt'aà xojon: “Mé tà ndaà-ne nga k'oas'ín binchimasòn jñà xita xi chjaya 'én ndaà-là Nainá

xi kjoa ts'e Cristo xi ts'e kjoa'nchán.”

¹⁶ Tanga mìtsà tà ngats'ìì xìtā Israel kisìkitasòn jè 'én ndaà-là Nainá xi kiì'nchré. Nga jè Isaías xìtā xi kiìchjā ngajo-là Nainá, k'oaá kitsò: “Na'èn, ¿yá xi kòkjeiín-là 'én xi jìn kinokjoàya-jen?” ¹⁷ K'oaá ma-ne, k'e nga mokjeiín-ná, yaá nchrobát'aà-ne k'e nga na'yá-lá 'én. K'oa jñà 'én xi na'yá, 'én ndaà-là Nainá xi kjoa ts'e Cristo-né.

¹⁸ Tanga, k'oaá xan: ¿A mìtsà kiì'nchré xìtā Israel jè 'én ndaà-là Nainá? Jon, kiì'nchré-né. Nga k'oaá tsò jè Xojon-là Nainá:

Kijndà isò'nde jyeé tsabísòn 'én-là.

Jyeé ijchò skanda ñánda fehet'aà-ne nangui.

¹⁹ Tìkooá xan-ná: jñà xìtā Israel, ¿a mì kisijìin-là kjoa koi? Kisijìin-là. Jè xi tíjna ítjòn, k'oaá kitsò Moisés:

'An, k'oaá s'ín s'iaàn nga kàtachìnichā jñò jngoò naxandá xi mìtsà naxandá ts'an xan-là.

Kàtamajticha it'aà ts'e naxandá xi chiba kjohítsjeèn tjín-là.

²⁰ Tìkooá Isaías 'nó tsi'beé-là ikon nga kiìchjā 'én-là Nainá nga kitsò:

Kisakò-là jñà xìtā xi mìkìl 'an tsohótsji-na.

Tsakó-là kjondaà-nā jñà xìtā xi mìkìl 'an kiskònanguiya-na.

²¹ Tanga jè Isaías k'oaá s'ín kiskìl it'aà ts'e xìtā Israel koni s'ín kitsò Nainá: “Nàchrjein nchijòn tsi-jmeé-là ndsaa nga kichjà'nchré-là jngoò naxandá xi kondra kiì-là 'én-nā nga mì kì kisìkitasòn.”

11

Kjohimatakòn xi tjin-la Nainá it'aà ts'e naxandá Israel

¹ 'Aán kjònunguia, jè Nainá, ¿a kitsjeiìn takòn naxandá-la Israel? Majìn, mì k'oaá s'ín tjin. 'An, tikoáá xita Israel-ná, tje-laá ma Abraham, xita xinguiáá ma xi ya nchrobát'aà-ne ts'e Benjamín. ² Nainá mìtsà tsachrjekàngui naxandá-la nga jye tjiìn-la nga tisa tàts'en-la kjoa nga ixti-la koma. ¿A mì tjiìn-nò koni tsò Xojon-la Nainá it'aà ts'e Elías nga k'oas'ín chjat'aà-la Nainá xi kondra ts'e Israel? Tsò: ³ “Na'èn, jña xita-lè xi kiichja ngajo-lè, jyeé kisik'en xita, koa jña i'nde tsjeè-lè jyeé kisikits'óna; tà 'an tajngò tijnáa isa, tikoáá mejèn-la siik'en-na.” ⁴ Tanga k'oaá tsò 'én xi tsjá Nainá: “Majìn, mìtsà tà ji tajngò tijni. Itoò jmù ma-ne xita xi 'an títsajnatjò-na xi k'j'eè tsà ya bincha-xkó'nchit'aà-la xkòsòn-la Baal.” ⁵ Nàchrjein i'ndeji tákó k'oaá s'ín ma, tjin isa xita Israel xi títsajnatjò-la Nainá xi xó jaàjiìn-ne xi kjondaà ts'e. ⁶ Tsà tà kjondaà ts'eé Nainá nga k'oas'ín jaàjiìn xita, tsòyaá-ne mìtsà koi kjoa-la kjondaà xi kis'iìn. Tanga tsà koií kjoa-la kjondaà xi kis'iìn, mì-la tsà ti kjondaà-la Nainá kjòchjeén-ne nga kitjaàjiìn xita.

⁷ ¿Kó s'ín tjin kjoa? Tsòyaá-ne nga kjín xita Israel mìkiì ijchòtjingui-la jè kjoa xi tshótsji. Tanga kis'e i'nga xita xi xó jaàjiìn-ne Nainá xi jye ijchòtjingui-la. Jña xita xi i'nga, 'nó kjòtájaàjiìn inima-la. ⁸ K'oaá s'ín tjit'aà Xojon-la Nainá nga tsò: “Nainá, kitsjaà-la nga kisijñòjiìn inima-la; jña xkon mìkiì tsejèn-la, kò líká-la, mìkiì 'nchré skanda

nachrjein i'ndeï.” ⁹ Jè xitaxá ítjòn David k'oaá ti kitsò:

Jè s'eí xi ochrje, tijè kàtama-ne ch'an nga kàtakaàngui, kàtasiya'ñó na'ya,

kò tijñà kàtasatíngui-ne mé-ne nga kàtas'e-la kjo'in.

¹⁰ Kàtasichjoà xkòn mé-ne nga mìkiì kòtsejèn-la nga kjit'aà nachrjein kàtamatsit'in ít's'in.

¹¹ 'An kjònangui-ná, ¿a jngoò k'a chixòt'aà nangui jñà xita Israel k'e nga kiasatèngui? Majìn. Mì k'oaá s'in tjín kjoa. Jè kjoa-la nga mìkiì kisikitasòn jñà xita Israel, jñà kitjoé-la xi mìtsà xita judío nga tsibìtsajnadeií xi kjoa ts'e jé-la. K'oaá s'in komà mé-ne nga jñà xita judío kàtachinì-ne it'aà ts'e kjondaà-la Nainá. ¹² Tsà jñà xita isò'nde kisakò-la kjoanchiná-la Nainá k'e nga jñà xita judío mìkiì kisikitasòn-la Nainá kò kisichijà kjondaà-la, isaá ta 'ñó ndaà s'e-la kjoa machikon-t'in jè isò'nde k'e nga jñà xita judío ijngoò k'a skoé i'nde-la ya nguixkòn Nainá.

¹³ Jñò chjàkò-nò xi mìtsà xita judío mì-nò. 'An kisixáya-na nga 'an kichjàjìin-la jñà xi mìtsà xita judío. 'An beèxkón-ná xá xi kits'ìi-na. ¹⁴ Tsà koií nachrjein-la kochiní i'nga xita xinguiáa mé-ne nga tikoá koma kítsajnadeií-ne xi kjoa ts'e jé-la.

¹⁵ Tsà jñà xita isò'nde kisakò-la kjoa'nchán it'aà ts'e Nainá k'e nga jñà xita judío itjokàngui, isaá tse kjondaà sakò-la jñà xita judío k'e nga skoétjò ijngoò k'a-ne Nainá. Skanda k'oaá s'in komat'in koni jngoò xita xi jye k'en kò kjoaáya-la it'aà ts'e kjoabiyaà. ¹⁶ Tsà tsjeè niño xi sindaà ítjòn nga kongatsja Nainá, tikoá tsjeè-né na'yo xi kochjeén nga sindaà niño k'e nga koma iskan. Tsà tsjeè it'aà ts'e Nainá i'ma-la yá, jñà chrja-la tikoá tsjeè-né.

17 Jñà xit̃a Israel, k'oaá s'ín ngaya-la koni jngoò yá olivo ndaà xi kitit̃t'aà chrja-la, koa ngaji k'oaá s'ín ngaya-la koni chrja-la yá olivo ij̃iìn ijñá nga ya kisikjoòkoji ya ngajo-la chrja-la yá olivo ndaà; k'oaá ma-ne nga ya tíchjoí jè nga'ño-la i'ma-la yá olivo ndaà. 18 Kì 'nga nìk̃j̃ni yijo-lè nga ya t̃itsakjoòkoji chrja-la yá olivo ndaà. T̃ik̃ítsj̃iìn nga tà kisikjoòko-nè; mìtsá j̃i 'biì-la nga'ño jñà i'ma-la yá olivo ndaà, tà saà j̃i tsjá-lè nga'ño jñà i'ma-la yá olivo ndaà.

19 J̃i, k̃i k'oaá si: “Kitit̃t'aà chrja-la yá olivo ndaà, nga 'an kisikjoòkoaa.” 20 T̃ik̃ítsj̃iìn koií kjoa-la nga mìk̃i mokjeiín-la nga kitit̃t'aà-ne. T̃anga j̃i koií kjoa-la nga mokjeiín-lè nga ya t̃ijnat'eì. Kì 'ngaá beè-la takòin, t̃iskón-la Nainá. 21 Nainá, tsà mìk̃i kitsjaà'nde-la jñà chrja-la jè yá olivo ndaà nga ya k̃ijnakjoòko t̃ikoaá ngaji tsà mì t̃i k̃iì mokjeiín-lè mì t̃i k̃iì tsjá'nde-lè nga ya k̃ijnakjoòkoji. 22 Ch̃it̃sejèn-la Nainá, 'ño ndaà xit̃a t̃anga t̃ikoaá jè xi mejèn-la nga ndaà k̃itasòn 'én xi chja. Mìk̃i beè ima jñà xit̃a xi chinchat'aaxin-la Nainá. T̃anga it'aà tsiji t̃itsjá-lè k̃jondaà. Tà jè xi mochjeén nga k'oas'ín k̃ijni koni s'ín t̃j̃in k̃jondaà xi kitsjaà-lè. Tsà maj̃in t̃ikoa kotet'aà-lè koni jngoò chrja-la yá. 23 Jñà xit̃a judío xi chrja-la yá xi kitit̃t'aà, tsà k̃okjeiín ĩjngoò k'a-la, komaá sincháya-ne i'nde-la, nga Nainá t̃j̃in-la nga'ño, komaá k̃ikjoò ĩjngoò k'a-ne. 24 J̃i, nga ya kitit̃t'aà-ne jñà yá olivo ij̃iìn ijñá koa kisikjoòkoji yá olivo ndaà nas'ín mìk̃i ya ok'in-lè. j̃isaá tà ndaà ok'in-la nga jñà chrja-la yá olivo xi xó kitjaàj̃iìn-ne nga sincháya ĩjngoò k'a-ne i'nde-la xi t̃ijè-ne yijo-la yá!

25 'Ndsè, mejèn-na nga ndaà kàtasijiin-nò kjoa'ma koi koni s'ín tjíndaà-la Nainá mé-ne nga mì 'ńó chjine kinachrje yijo-nò. Jè kjoa nga tjín i'nga xita Israel xi kjòtájaàjiin inima-la nga mìkiì mokjeiín-la, tanga skanda k'eé kòkjeiín-la k'e nga jye kòkjeiín yije-la xi mìtsà xita judío. 26 K'e nga jye k'oas'ín koma, ngats'ì xita Israel kítsajnandeií-né xi kjoa ts'e jé-la, koni s'ín tíchja xojon nga tsò:

Yaá nindoò Sión kjinchrobà-ne xi ma-la sìikítsajnandeií xita Israel xi kjoa ts'e jé-la, jè xi kjoaáxìn-la jé-la jña xita tje-la Jacob.

27 Jè kjoa xi bìndaàjiin-koaa

k'e nga kjoaáxìn-la jña jé xi tjín-la.

28 Kjoa ts'e 'én ndaà-la Nainá xi kjoa ts'e Cristo, jña xita judío, kondra-laá ma Nainá mé-ne jño sakò-nò kjondaà. Tanga jè kjoa nga xó kitjaàjiin-ne xita koi, tákó matsjakeè Nainá nga jye kos'ín kitsjaà-la tso'ba jña xita jhínga kjiin-la.

29 Nainá mìkiì faáxìn kjotjò xi tsjá, tíkoa mìkiì faáxìn 'én xi chja-ná. 30 Jño, k'oaá tís'ín ki'nè nga sa kjòtseé; mìkiì kinìkitasòn-la Nainá, tanga i'ndeijyeé kisakò-nò kjohimatakòn, koií ngatji-la nga mìkiì kisìkitasòn jña xita judío. 31 Nachrjein i'ndeijña xita judío mìkiì síkitasòn-la Nainá. Tanga tà koi-né nga jè Nainá tjín-la kjohimatakòn xi it'aà tsajòn mé-ne jña xita koi tíkoaá s'e-la kjohimatakòn ts'e Nainá. 32 Nainá, k'oaá tsò nga ngats'ì xita judío, kò xi mìtsà xita judío, mìkiì síkitasòn-la nga jè xi mejèn-la Nainá nga ngàsòn ngáya kohimakeè ngats'ì xita.

33 ¡Mé tà 'ńó tse ma kjoanchiná xi tjín-la Nainá, kò 'ńó tse kjoachjine tjín-la kò kjohítsjeèn-la!

Nijngoò xita xi machiya-la kós'ín kosòn-la k'e nga bínđaàjìin kò kós'ín tjín ndiyá-la. ³⁴ ¿Yá xi beè kós'ín tjín kjohítsjeèn-la Nainá? Mì yá xi koma-la sùikíchiya-la Nà'èn-ná. ³⁵ ¿Yá xita xi jè kisìkìña ítjòn-la xi mochjeén-la Nainá mé-ne nga jè sùikátji ngajo-la? ³⁶ It'aà ts'eé Nainá nchrobát'aà-ne ngats'ù tsojmì xi tjín, tìkoà it'aà ts'e-né nga titsakon, kò k'oaá s'ín mochjeén nga jeya kíjna.

Nainá, kàtas'e-la kjoajeya nita mé nachrjein-ne. K'oas'ín kàtama.

12

Mé xi s'eén nga tsjeè sijchá yijo-ná koni s'ín sasén-la Nainá

¹ K'oaá ma-ne 'ndsè, nga tse kjohimatakòn tjín-la Nainá xi it'aà tsaján, 'an bìtsi'bà-nò nga k'oas'ín tìngatsja yijo-nò it'aà ts'e Nainá koni jngoò kjotjò xi tìjnakon, xi tsjeè tjín, xi ndaà sasén-la Nainá; nga nguì kò inìma-nò kò kjohítsjeèn-nò jeya sùikíjna Nainá. ² Kì k'oas'ín onguíkò yijo-nò koni s'ín tjín kjotìxoma-la isò'nde. Tìxítseya kjohítsjeèn-nò nga kàtatjìya-nò koni s'ín titsanìjchá yijo-nò mé-ne nga jcha-nò mé xi mejèn-la Nainá it'aà tsajòn, jña kjoa xi ndaà tjín, xi nguì tjíkixi, xi jè ndaà sasén-la.

³ It'aà ts'e xá xi 'an kitjoé kjotjò-na, k'oaá xan-nò nga jngoò ìjngoò, kì 'nga onguíkò kjohítsjeèn-nò koni s'ín tjínè-la nga sùikítsjeèn; tà saà ndaà tìkítsjeèn koni s'ín ok'in-la kjondaà xi kitsjaà-nò Nainá k'e nga kòkjeiín-nò it'aà ts'e Cristo. ⁴ Koni s'ín tjín yijo-ná nga kjìn skoya tjín-la tanga kakj'eíí kakj'eíí xá tjín-la nga ìjngoò ìjngoò skoya. ⁵ K'oaá

s'ín ma it'aà tsaján nga kjìn ma-ná, tanga xi it'aà ts'e Cristo tà jngoò ma-ná nga ìjngoò ìjngoá; k'oaá s'ín kindoba'ñoá xinguiáá koni s'ín kitsobà'ñoó xíkjín yijo-ná.

⁶ Koni s'ín kjòmejen-la Nainá jye kitsjaà-ná xá xi s'eén nga jngoò ìjngoá. Jngoò xíta, tsà jè xá kitjoé-la nga xíta kichjayajin-la, k'oaá s'ín kàtasíkjeén koni s'ín mokjeín-la. ⁷ Tsà jè xá kitjoé-la nga xíta kosíko, k'oaá s'ín kàtasíkjeén nga ndaà kàtasíko xíta. O xi jè xá kitjoé-la nga kòkòya, k'oas'ín kàtasíkjeén nga ndaà kàtakòya. ⁸ Jè xi kitjoé-la xá nga sìjehikon xíta, k'oas'ín kàtas'ín. Jè xi ma-la sika'bí tsojmi, ngui koó inima-la kàtasíka'bí; jè xi xá ítjòn kjòngatsja, ndaà kàtasíkitasòn; jè xi síchját'aà-la jña xíta ima, koó kjotsja-la kàtasíchját'aà-la.

⁹ Ngui koó inima-nó tìtsjacha xinguiòo. Tìjticha kjoa xi ch'o tjin. Koií tanguítjngui-là kjoa xi ndaà tjin. ¹⁰ Koó kjotsja-nò tìtsjacha xinguiòo nga 'ndsè chiba. Ìsa ndaà jchaxkón xíta xinguiòo xi i'nga; jña tìkítsajna ítjòn nga jngoò ìjngoò.

¹¹ Kì ts'eè 'nè xi xá ts'e Nainá. Ngui koó inima-nò tixá-là Na'èn-ná.

¹² Tsja te-lá takòn jè kjoa xi chiña-là. Ko inima-nò kàtachíkjoako-nò kjo'in xi titsanikjioón. Nachrjein nchijòn tìtsi'ba-là Nainá.

¹³ Tjii-là mé xi mochjeén-la jña xíta tsjeè-la Cristo. Chjoétjò xíta xi bijchó ya ni'ya-nò.

¹⁴ Tjjet'aà-la Nainá nga kàtasíchikon-t'in jña xíta xi ch'o síko-nò; kì k'oaá s'ín nìjèt'aà-là nga kjo'in tsjá-la.

¹⁵ Tìtsjakoo jña xíta xi tsja tjin-la. Chìhindáyakoo jña xi nchikjindáya.

16 Tà jngoò t'een kjo_hítsjeèn-nò. Kì 'nga ikon 'nè yijo-nò, ya tsjahijtakoo jñà xita ima. Kì 'ñó chjine nachrjenguioò yijo-nò.

17 Jñà xita xi ch'o síko-nò, kì ch'o nìkoo ngajo-nò. Kjit'aà nachrjein ndaà t'een nga nguixkon ngats'iì xita. 18 Skanda ñánda sakó'nde-nò, jñò tjínè-nò nga 'nchán titsajnakoo ngats'iì xita. 19 Ndí 'ndsè xi matsjake-nò, k'e nga mé xi mat'ioòn, kì jñò 'nè ngajo-nò. Tsja Nainá tikijnaya kjoa-nò mé-ne nga jè tsjá-ne kjo'in. K'oaá s'ín tíchja Xojon-la Nainá nga tsò: “Tsò Na'èn-ná: 'Aán oko-na nga kındaàjiin-la xita, 'aán tsja-la chjí-la.” 20 K'oaá ma-ne, tsà jè kondra-lè, tsà tsjin tsojmì xi kine, jíi tjì-la; tsà xínda-la, tjì-la nandá nga kàt'iì. K'e nga koa sikoi, kosobà tì'biì-la kondra-lè, chiba-la kohinì isén-la koni xá'í. 21 Jè kjoa xi ch'o tjín, kì jè síkijne-nò; tikoaá-ne jè kàtitasòn xi kjondaà, mé-ne nga síkijne-la kjoa xi ch'o tjín.

13

Mé kjoa-ne nga nìkitasòn-lá xi xitaxá títsajna

1 Ngats'iì xita kàtasíkitasòn-la xi xitaxá títsajna, nga Nainá kitsjaà-la kjo_tíxoma. Jñà xi xitaxá títsajna, Nainá kitsjaà-la xá. 2 Jñà xita xi bitsajna tájaà-la kjo_tíxoma-la xitaxá, kondraá bitsajna-la jñà xita xi Nainá kitsjaà-la xá. Jñà xita koi, tí yijo-laá tóbínè-la kjo'in. 3 Jñà xitaxá mìtsà koi xá títsajna-ne nga jñà kìnchaxkón-la xita xi ndaà s'ín, jñà-né xita xi ch'o tjín kjoa xi s'ín. Tsà mejèn-lè nga mìkì kiskón-la xitaxá, ndaà t'íin, ko jñà xitaxá ndaà sìkíjna-lè. 4 Jñà xi xitaxá tjín-la, xá ts'e Nainá nchisíkitasòn, mé-ne nga ndaà kijnane.

Tanga tsà ch'o tjin kjoa xi tì'nì, tiskón-la xi xitaxá tjin-la, nga tji'nde-la nga tsjaà-lè kjo'in. Nga xá-la Nainá nchis'ín k'e nga bíndaàjiin kjoa ko nga tsjá-la kjo'in jñà xita xi ch'o s'ín. ⁵ K'oaá ma-ne nga mochjeén-né nga ndaà sikitasòn-lá jñà xi xitaxá títajna, mìtsà tà koi-ne nga kjo'in tsjá-ná; koi-né nga xó k'oas'ín beè-la takoán nga tjinè-ná nga sikitasoán. ⁶ Koi kjoa-la nga tikoa machjí ton sá, nga jñà xitaxá k'oaá s'ín nchisikitasòn-la Nainá ko kjit'aà nachrjein koatjin xá xi nchis'ín.

⁷ Tichjió yije mé xi kitjen-nò. Jè xi kitjen-la ton sá, kàtíhjí. Jè xi kitjen-la tsojmì xi machjítjì, kàtíhjíjì. Jè xita xi mochjeén-la nga jchaxkón, kàtayaxkón. Jè xita xi mochjeén-la nga ndaà kína, ndaà tikína. ⁸ Kì mé xi jmeèt'ioòn yijo-nò. Tanga kitjeén-nò ts'e kjoatjòcha it'aà ts'e xita xinguiòo. Nga jè xi matsjakeè xíkjin, jyeé kisikitasòn yije Kjotixoma. ⁹ Jñà kjotixoma tsò-ne: “Kì kjoa chingui 'nì, kì xita nìk'in, kì chijé 'nì, kì 'én ndiso nokjoì, kì maxitakòn-chiì xinguii.” Ngats'ìì kjotixoma koi, ko xi kjeí, yaá mangàsòn yije jè kjotixoma xi tsò: “Titsjachi xita xinguii koni tsà ti yijo tsiji-ne.” ¹⁰ Jè xi matsjakeè xíkjin, mìtsà ch'o síko xita xíkjin. Jè xi matsjakeè xíkjin, jyeé ndaà tísikitasòn Kjotixoma.

¹¹ K'e nga k'oas'ín s'eén yijeé kjoa koi, jcha-ná nachrjein i'ndeí mé kjoa xi tíma nga jye ijchò chiba-la nga sikja-lá yijo-ná nga titsafè. Koni k'e nga sa kòkjeín-ná, jye 'ñó kjòchrañà'taà nachrjein nga kitsajnandiaá kjoa ts'e jé-ná. ¹² Nitjen, jyeé tífahato, jyeé tímachrañà nachrjein nga s'e isén nga kitjojen òjngoò k'a Na'èn-ná. Kinachrjenguaá ngats'ìì kjoa xi ma ñánda nga jñò choòn ko chjoé

nga'ño-là Nainá koni s'ín mochjeén ñánda iseèn choòn koni tsà kicha ts'e soldado. ¹³ K'oaá s'ín iseèn kitjá koni nàchrjein nga ndaà sijchá yijo-ná. Mì kì mochjeén nga taxkì chjineé tsojmì kò nga mach'iaá. Mìkì mochjeén nga íchjín kjóhijtakoáá, kò mì kì ma taxkì sikoáá yijo-ná. Mìkì mochjeén nga xita kixkàn-koaá kò mìkì mochjeén nga kjoaxitakòn kichjà-lá xinguiáá. ¹⁴ K'oaá s'ín tijchá yijo-nò koni s'ín kis'iin jè Na'èn-ná Jesucristo, kì kii nìkitasòn-là yijo-nò kjoa ch'o xi síjé.

14

K'e nga mìkì mangàsòn kjohítsjeèn-ná it'aà ts'e kjoa xi mì xó kii tjí'nde-ná nga s'eén

¹ Chjoétjò xita xinguiòo xi mìkì tjíngoò ikon mé kjoa xi tjí'nde-là nga s'iin; kì chibàya-nò jñà kjoa xi mìkì mangàsòn kjohítsjeèn-nò. ² Tjín xita xi k'oas'ín mokjeiín-là nga ma chine yije tsojmì xi tjín, tikoá tjín xita xi mìkì mokjeiín-là tsà ma chine yije tsojmì xi tjín. Tà jñà tsojmì xi nangui síjchá kine. ³ Jè xi kine yije tsojmì xi ma chine mìkì koma kochrjekàngui jè xi mìkì ma-là kine yije tsojmì; kò jè xi mìkì ma-là kine yije tsojmì, mìkì koma kichjajno-là jè xi ma-là kine yije tsojmì xi tjín, nga Nainá jyeé kiskoétjò nga kí'ndí-là ma. ⁴ ¿Yá-né jì nga nìkindjì chì'nda xi mìtsà tsiji? Nga chì'nda ts'e Nainá-né. Jè chì'nda jè, kindà ts'eé nei-là tsà kixi tjína kò tsà mì kixi tjína. Tanga kixi kíjna, nga jè Na'èn-ná tjín-là nga'ño nga kixi sijkíjna.

⁵ Tjín xita xi tsò: tjín nàchrjein xi isa xkón. Tikoá tjín xi tsò: Nàchrjein, tà ngàsòn ngayá-né nga nàchrjein nchijòn. Nga jngoò ijngoò xita, k'oaá s'ín

ndaà katíjngò-là ikon koni s'ín síkítsjeèn. ⁶ Jñà x̄it̄a xi faájìin jngòò nàchrjein nga beèxkón, k'oaá s'ín nga jeya síkíjna Na'èn-ná; koa jñà x̄it̄a xi tsò nga ta ngàsòn ngáya nàchrjein, t̄ikoaá k'oaá s'ín s'ín nga t̄ikoa jeya síkíjna Na'èn-ná. Jñà x̄it̄a xi kine yije tsojmì, ìt'aà ts'e Na'èn-ná kine, nga tsjá-là kjondaà Na'èn-ná k'e nga kine; k'oa jñà x̄it̄a xi tsò nga t̄jín tsojmì xi mìkìl ma chine, t̄ikoaá ìt'aà ts'eé Na'èn-ná nga mìkìl kine tsojmì, kò t̄ikoaá tsjá-là kjondaà Na'èn-ná.

⁷ Jñá, k'e nga titsajnakoaán, mìtsà koi xá titsajnakon-ná xi ta kjondaà tsaján. Kò k'e nga kiyá, mìtsà ta kjondaà tsaján k̄inchátsjiaá nga kiyá. ⁸ Tanga k'e nga titsajnakoaán, koií xá titsajnakoaán xi kjondaà ts'e Na'èn-ná. Kò nga kiyá, t̄ikoaá koií xá kiyá-aná xi kjondaà ts'e Na'èn-ná. K'oaá ma-ne tsà titsajnakoaán kò tsà kiyá kjondaà ts'e Na'èn-ná nga ts'e tsò-ná. ⁹ Koií kjoa-là nga k'en Cristo koa jaáya-là nga tsibìjnakon-né, mé-ne nga jè koma-ne Nei-là jñà x̄it̄a xi biyaà kò xi t̄itsajnakon.

¹⁰ Tanga jì xi nokjoàjno-là 'ndsì, ¿mé-ne koa'nè-ne? T̄ikoaá jì xi nachrjekàngui 'ndsì, ¿mé-ne nachrjekàngui-ne? Nga ngats'ìi-ná k̄ijchò k̄inchanguiaá ndsòko Cristo ñánda nga jè tíhotíxoma. ¹¹ K'oaá s'ín tíchj̄a Xojon-là Nainá nga tsò:

Tsò Na'én-ná: 'An t̄ijnakon-ná,
ngats'ìi x̄it̄a k̄incha-xkó'nchit'aà-na
kò ngats'ìi x̄it̄a skoexkón Nainá.

¹² Ngats'iaá k'oi-lá kindà Nainá mé kjoa xi ki'né nga tsitsajnaá ìsò'nde.

13 K'oaá ma-ne nga mì t̃j xinguiáá k̃inókjoajno-lá; j̃ñò, ta saá ndaà t̃ikítsjeèn nga ñimé xi s'een xi s̃ikits'ón-j̃iìn koni s'ín mokjeiín-la xinguióo mé-ne nga mì jé skaj̃iìn l̃jngoò k'a-ne. 14 'Ãn ndaà t̃jngoò takoàn it'aà ts'e Na'èn-ná Jesús nga kixi kjoa nga tsj̃ìn tsojmì xi xkón t̃jín nga mìkì ma chine; tanga jè x̃ita xi k'oas'ín s̃ikítsjeèn nga t̃jín tsojmì xi xkón t̃jín nga mìkì ma chine, xkón t̃jín-la it'aà ts'e tsà skine. 15 Tanga tsà ta koií kjoa-la ts'e tsojmì xi chinii, jè 'ndsi ch'o ma-la, jè kjoa xi t̃i'nì m̃itsà t̃j kjoatjòcha-ne; k̃i k̃i biì'ndi nga jè 'ndsi xi Cristo k'en ngajo-la k̃its'ón-j̃iìn-la xi tà kjoa ts'e tsojmì xi chinii. 16 Kì k'oaá s'ín 'nè mé-ne nga mì x̃ita k̃ichjajno-nò it'aà ts'e kjoa xi t̃itsa'nè nga k'oas'ín mokjeiín-nò nga ndaà t̃jín. 17 K'e nga jè Nainá t̃ihotíxoma-ná m̃itsà jè xi isa 'ñó chj̃i-la mé xi s'ioaá k̃o mé xi ch̃ineé. Jè xi 'ñó mochjeèn nga kixi k̃itsajnaá, 'nchán s̃ijchá yijo-ná, k̃o tsja k'oé-lá iñima-ná; koi kjoa xi tsj̃a Iñima Tsjeè-la Nainá. 18 Jè xi k'oas'ín s̃ikitasòn kjoa koi k'e nga síxá-la Cristo, ndaà sasén-la nguixk̃on Nainá, t̃ikoaá ndaà bĩjna nga nguixk̃on x̃ita.

19 K'oaá s'ín k̃jit̃jngui-lá kjoa xi 'nchán s̃ikíjna-ná k̃o kjoa xi 'bì-lá nga'ñó xinguiáá nga jngoò jn-goaa koni s'ín mokjeiín-ná. 20 Kì xá-la Nainá ñikits'ón-j̃iìn-la xi ta kjoa ts'e tsojmì xi ma chine. Kixi kjoa, ngats'ii tsojmì xi t̃jín, tsjeè-né. Tanga jè xi ch'o t̃jín k'e nga ta koi kjoa-la tsojmì xi ch̃ineé bits'ón-j̃iìn-la kjoa xi mokjeiín-la it'aà ts'e Nainá j̃ñà x̃ita xi k̃jeíí. 21 Isáá ndaà-ne nga mì yijo ch̃jineé, nga mì xán s'ioaá, nga ñimé kjoa xi s'een jè xi s̃ikits'ón-j̃iìn-la jè 'ndsi nga sakó-la jé. 22 Koni s'ín

mokjeiín-lè it'aà ts'e kjoa koi, tà jíí tjiín takoín kò Nainá. Mé tà ndaà-la jè xi mì kjo'in bínè-la yijo-la k'e nga tíjngò ikon nga ndaà tjin kjoa xi s'in! ²³ Jè xi jò tjin-la k'e nga mé tsojmì xi kine, jé tihónè-la yijo-la nga mìkì tjiíngò ikon tsojmì xi kine. Tsà mìkì tjiíngò takoán k'e nga mé kjoa xi s'eén, jé titsahonè-lá yijo-ná.

15

¹ Jñá xi jye kixi mokjeiín-ná it'aà ts'e kjoa xi tji'nde-ná mé xi s'eén, mochjeén-né nga tikoá kichikjoako-ná jñà xita xi k'oas'in mokjeiín-la nga mìkì tji'nde-la mé kjoa xi s'iin. Mìtsà tà jñà kjoa xi ndaà sasén-ná kinchátsjiaá. ² Nga jngò ìjngoá, mochjeén-né nga k'oas'in s'eén jè kjoa xi sasén-la jñà xita xinguiáá xi kjondaà ts'e, mé-ne nga kijin-isa kjohítsjeèn-la jè kjoa xi mokjeiín-la. ³ Nga tikoá jè Cristo mìtsà jè tsohótsji kjoa xi sasén-la yijo-la, tà saá it'aà ts'eé tsitasòn koni s'in tji't'aà xojon ts'e Salmo, nga tsò: “Én ch'o xi ji kichjajno-lè, 'aán kiskaàt'aà-na.” ⁴ Jñà 'én xi kitjei nga sa kjòtseé, koií xá kitjei-ne nga kòkòya-ná mé-ne nga it'aà ts'e Xojon-la Nainá, tseé s'eén takoán tikoá s'e-la kjoa'nchán inima-ná, mé-ne nga koma chíñakjoa-lá it'aà ts'e Nainá. ⁵ Nainá xi ma-la tsjá-ná kjoatsetakòn kò xi ma-la sí'nchán-jìin inima-ná, k'oas'in jngò kjohítsjeèn kàtatsjá-nò nga jngò ìjngò koni tsò Cristo Jesús, ⁶ mé-ne ngats'ioò ngàsòn jngò jta jeya tikíjna Nainá, Na'èn-la Jesu-cristo xi otixoma-ná.

⁷ Koií kjoa-la k'oas'in choétjò xinguiòo nga jngò ìjngò koni s'in kiskoétjò-nò Cristo mé-ne nga jeya kíjna-ne Nainá. ⁸ K'oaá xán-nò, jè Cristo

Jesús, koií xá j'ìi-ne nga j'ìi síxájìin-la xítà judío xi tjí't'aa chíba-la kjoa ts'e circuncisión mé-ne nga tsakó-ne kjoakixi-la Nainá tikoá síkitasòn koni s'ín jye kitsjaà-la tso'ba Nainá jñà xítà jchínga kjiin-la. ⁹ Tikoáá koií xá j'ìi-ne mé-ne nga jñà xi mìtsà xítà judío jeya siikíjna Nainá it'aa ts'e kjohimatakòn xi tjin-la Nainá koni s'ín tíchja Xojon-la Nainá, nga tsò: Koií kjoa-la nga jeya siikíjna-lè jjiin-la xítà naxandá xi mìtsà xítà judío.

It'aa tsiji sé-lè sò xi ndaà tsò.

¹⁰ Ìjngoò k'a tjí't'aa xojon ñánda nga tsò:

Jñò xi mìtsà xítà judío 'mì-nò,
tsjaá t'è-lá takòn kò xítà naxandá-la Nainá.

¹¹ Ìjngoò k'a tjí't'aa xojon ñánda tsò:

Jñò ngats'ioò xi mìtsà xítà judío 'mì-nò,
jeya tikíjna Na'èn-ná,
ngats'ioò xi naxandá 'mì-nò jeya tinachrjeè Nainá.

¹² Ìjngoò k'a tjí't'aa xojon ts'e Isaías ñánda tsò:

Jè tje-la Isaí kítjot'aa jngoò-ne jts'én-la xi
kotìxoma-la jñà xi mìtsà xítà judío,
kò jè jts'én jè kòt'aa ikon nga skóña-kjoa-la.

¹³ Nainá xi tsjá nga chiñakjoáá, kàtatsjá yije-nò kjotsja kò kjoa'nchán nga mokjeiín-nò it'aa ts'e, mé-ne nga isa ndaà chíñakjoa isa xi kò nga'ñó-la Inima Tsjeè-la Nainá.

Pablo chí'nda-la Jesucristo

¹⁴ Tanga ndí 'ndsè, 'an tíjngoò takoàn xi it'aa tsajòn xi tíjñò-nò tjin-nò kjondaà tikoá machiya-nò nga koma tíjñò sikixiya-là xítà xinguiòo nga Ìjngoò jngoò. ¹⁵ Ndí 'ndsè, 'nó tíbeè-la takoàn nga tikjiin-nò xojon jè; tíchja kixi-nò, mé-ne nga mìkiì jchàajìin-nò koni tsò xojon jè. Koií

k'oas'ín tìsikítsjeèn-nò nga 'an kitjoé-na kjoṭjò-la Nainá k'e nga kitsjaà-na xá, ¹⁶ mé-ne nga 'an koma-na chí'nda-la Jesucristo it'aà ts'e xi mìtsà xita judío. Sìxákoaa 'én ndaà-la Nainá, mé-ne jñà xi mìtsà xita judío ndaà sasén takòn-nè Nainá koni jngoò kjoṭjò xi 'ñó sasén-la Nainá nga it'aà ts'e Inima Tsjeè-la Nainá jyeé kjoṭsjeè.

¹⁷ 'An tjin-na mé kjoa-ne nga matsja-na it'aà ts'e Cristo ts'e xá xi tìs'iaàn. ¹⁸ Nì mé kjoa tjin xi ma'ñót'aà takoàn nga ma chjà, ta jè kjoa ts'e Cristo nga 'an síkjeén-na nga sìxákoaa jñà xi mìtsà xita judío mé-ne nga koma sikitason-la Nainá. K'oaá s'ín kis'iaàn it'aà ts'e 'én xi kichjà ko it'aà ts'e xá xi kis'iaàn, ¹⁹ ko it'aà ts'e kjoxkón xi okó kjoajeya-la Nainá ko it'aà ts'e nga'ño-la Inima Tsjeè-la Nainá. Jyeé ndaà kisìngásoàn 'én ndaà-la Nainá xi kjoa ts'e Cristo, tsibìts'iaako-na ján Jerusalén kóhokji nga jngoò itjandi-la skanda ján Ilírico. ²⁰ K'oaá s'ín tsibìnè-la yijo-na nga kichjàya 'én ndaà-la Nainá xi kjoa ts'e Cristo ya i'nde ñánda kj'eè yá bénojmiya it'aà ts'e Cristo, mé-ne nga mì 'an kokoòya ndaà-la xita xi kj'eí xi jye tsakóya ítjòn-la it'aà ts'e Cristo. ²¹ Koni s'ín tjit'aà Xojon-la Nainá nga tsò:

Skoé-né jñà xita xi mì yá tsibénojmi-la it'aà ts'e;
kochiyaá-la jñà xita xi kj'eè mé 'én 'nchré xi it'aà ts'e.

Kós'ín tìsikítsjeèn Pablo nga mejèn-la kjoì Roma

²² Kò kjìn k'a mejèn-na fikon-nò tanga jñà xá xi 'an tìs'iaàn i i'nde jé mìkì tjò'nde-na nga ma fia. ²³ Tanga i'ndeì nga jye jyehet'aà xá-na ijndé, ko tikoá kò kjìn nó tjin-la nga mejèn fikon-nò, ²⁴ k'oaá s'ín tìsikítsjeèn, k'e nga kjián ján España,

k'eé kichjàjto-nò mé-ne nga skoexkon-nò. K'e nga jye chibá jngoò tjoà koma kinchako-ná nga koma kjián ñánda nga tífia. ²⁵ Tanga i'ndeji ján Jerusalén tífia, nga tífiko jngoò-la nga'ño jña xita-la Cristo xi ya títsajna. ²⁶ Nga jña xita naxandá-la Nainá xi títsajna Macedonia ko Acaya kjòtsja ts'e-né nga tsibíxkó chiba ton koni jngoò nga'ño xi kjòtjò ts'e xita ima naxandá-la Cristo xi títsajna ján Jerusalén. ²⁷ Ngui kjòtsja ts'e-né koni s'in kis'iin jña xita koi. Nga tjen-t'in-la kjondaà. Tsà jña xita xi mìtsà xita judío k'oaá s'in kisakò-la kjondaà ya ijìin inima-la it'aà ts'e xi ngui xita judío, tikoáá tjinè-la jña xi mìtsà xita judío nga kinchako nga tsjá-la tsojmì xi mochjeén-la. ²⁸ K'e nga jye kjoehet'aà kjoa koi nga jye sngatsja jè ton xi kjòxkó, ikjoàn skotsejèn jngoò tjò-nò, k'eé kjián ján España. ²⁹ Be-ná nga 'ño ndaà sìichikon-t'in-ná Cristo k'e nga kichokon-nò.

³⁰ Tanga jño ndí 'ndsè, bìtsi'bà-nò it'aà ts'e Na'èn-ná Jesucristo ko it'aà ts'e kjoatjòcha xi tsjá-ná Inima Tsjeè-la Nainá, tinókjoat'aà-là Nainá xi it'aà ts'an, ³¹ mé-ne nga kosiko-na Nainá it'aà ts'e xita xi mìkiù mokjeiín-la xi títsajna ján Judea, ko mé-ne nga jè ton xi tífiko-la xita-la Cristo xi títsajna ján Jerusalén ndaà kàtasasén-la, ³² mé-ne nga, tsà k'oas'ín mejèn-la Nainá, nga ko kjòtsja-na kichokon-nò, tikoá koma ndaà sìikjája chiba nachrjein-ko-nò. ³³ Jè Nainá xi tsjá-ná kjoa'nchán kàtijnako-nò ngats'ioò. K'oas'ín kàtama.

16

Kós'ín kisihixat'aà Pablo ngats'ii xita naxandá-la Nainá xi títsajna Roma

1 It'aà tsajòn sìngatsja-nò jè tichjaá Febe, jè xi síchját'aà naxandá-là Cristo xi ya tìjna Cencia; 2 ndaà chjoétjò xita jè nga xinguiá ma nga tìkoá mokjeín-là it'aà ts'e Na'èn-ná nga k'oaá s'ín ok'ín-là xi xita-là Cristo. Tìchját'aà-là nita mé xi kochjeén-là nga 'ño kjin xita tsasìko, tìkoá 'an kisìchját'aà-na.

3 Tìixat'eì jè Priscila ko Aquila, jña xita xi taña nìxáko-jen it'aà ts'e Cristo Jesús. 4 Jña xita koi kjomeè kinik'en xi kjoa ts'an. Mìtsà tà 'an xi tsjaà-là kjondaà tìkoá tsjá-là kjondaà ngats'ìi xita naxandá-là Cristo xi mìtsà xita judío. 5 Tìkoá tìixat'eì jña xita naxandá-là Cristo xi maxkóya ya ni'ya-là Priscila ko Aquila. Tìixat'eì jè Epeneto xi 'ño matsjake nga jè kòkjeín ítjòn-là it'aà ts'e Cristo ya i'nde Acaya. 6 Tìixat'eì jè María, chjoón xi 'ño ndaà kisìxá it'aà tsajòn. 7 Tìixat'eì jè Andrónico ko Junias, xi xinguiá ma nga taña tsitsajna'ya-jen ndayá. Jña xita xi tsibíxáya-là Cristo 'ño matsjakeè xita koi. Ko isa ítjòn kijtseèxkon 'én-là Cristo koni 'an.

8 Tìixat'eì jè Amplias, jè xita xi 'an 'ño matsjake it'aà ts'e Na'èn-ná. 9 Tìixat'eì jè Urbano xi taña síxáko-na it'aà ts'e Cristo Jesús ko jè Estaquis xi 'an 'ño matsjake. 10 Tìixat'eì jè Apeles xi ndaà kixi mokjeín-là it'aà ts'e Cristo. Tìixat'eì jña xita xíkjin xi ya títajna ni'ya-là jè Aristóbulo. 11 Tìixat'eì jè Herodión xi xinguiá ma. Tìixat'eì jña xita xíkjin xi ya títajna ni'ya-là Narciso xi Na'èn-ná títajnakò. 12 Tìixat'eì jè Trifena ko Trifosa jña íchjin xi 'ño síxá-là Na'èn-ná, ko tichjaá Pérsida xi 'ño matsjachaá nga tìkoá ndaà síxá-là Nainá.

13 T̄iixat'eì jè Rufo xi xó jaàjiìn-ne Nainá. Kò nea-là xi 'an k'oa t̄is'ín beètakoàn koni tsà nea-na.

14 T̄iixat'eì jè Asíncrito, jè Flegonte, jè Hermas, jè Patrobas, jè Hermes kò x̄ita 'ndseé xi ya t̄ítsajna kò.

15 T̄iixat'eì jè Filólogo, jè Julia, jè Nereo kò ndichja, kò Olimpás, ngats'ìi x̄ita xi mokjeiìn-là ìt'aà ts'e Cristo xi ya t̄ítsajna kò.

16 J̄nò nga jngoò ìjngoò, k'e nga s̄ixat'aà xinguioo, nguì koó inima-nò t̄iixat'aà xinguioo nga kò okixi-nò. Ngats'ìi x̄ita naxandá-là Cristo xi ì t̄ítsajna síhixat'aà-nò.

17 Ndí 'ndseé k'oaá s'ín bìtsi'bà-nò nga chísejèn-là j̄nà x̄ita xi síjòya kò xi síkits'ón-jiìn koni s'ín mokjeiìn-nò, j̄nà xi kondra f'ii-là kjohitsjeèn koni s'ín kichita'ya j̄nò. T̄inchat'aàxin-là j̄nà x̄ita koi.

18 J̄nà x̄ita koi, mìtsà Na'èn-ná Jesucristo síxá-là, tà yijo-láá síxátjì. 'Én sin 'én ndaà chja nga konachan-là x̄ita xi mìkiì ndaà machiya-là. 19 'An, matsjaá-na ìt'aà tsajòn nga jye ndaà na'ya-nò nga ndaà nìkitasòn. Tanga 'an mejèn-na nga x̄ita chjinee kàtama ìt'aà ts'e kjoa xi ndaà tjín. Kò j̄nà kjoa xi ch'o tjín, kj'eè kiì na'ya-nò. 20 Jè Nainá xi tsjá-ná kjoa'nchán, tà chibaá chja-là nga ya sìikíjnangui ndsokoò jè x̄ita neíí mé-ne nga koma kìnchanè. Kjondaà-là Na'èn-ná Jesucristo kàtijnako-nò.

21 T̄ísíhixat'aà-nò jè Timoteo xi taña nìxákjoò-jen, kò Lucio, kò Jasón kò Sosípater j̄nà xi x̄ita xinguiaa ma.

22 'An xi Tercio mì-na, xi t̄ikjiì-nò xojòn jè, ìt'aà ts'e Na'èn-ná, sìhixat'aà-nò.

23 T̄ìkkoa t̄ísíhixat'aà-nò Gayo; 'an ìí t̄ijnaa ì ni'ya-là nga t̄ìkkoa ìí bixoña ngats'ìi x̄ita naxandá-là Cristo.

Tísíhixat'aà-nò Erasto x̄it̄a xi bítjò t̄on ts'e ni'ya osen; t̄ikoáá síhixat'aà-nò jè 'ndseé xi 'mì Cuarto.

²⁴ Ngats'ioò, jè kàt̄ijnakò-nò kj̄ondaà-la Jesucristo xi ot̄ixoma-ná.

'Én xi fehet'aà-ne

²⁵ Jeya kàt̄ijna jè Nainá xi t̄ijnakò-nò. Jè xi komà tsjá-nò nga'ńó t̄ikoá komà kixi s̄ilkítsajna-nò koni tsò 'én ndaà-la Nainá xi 'an okoòya-nò k̄o j̄nà 'én xi nokjoàyaj̄īn-nò it'aà ts'e Na'èn-ná Jesucristo. Nga jyeé tí'ya-la kjoá xi t̄jí'ma-la Nainá skanda sa kj̄otseé; ²⁶ tanga i'ndēj jye ki'ya-la koni s'ín t̄íchj̄a Xoj̄on-la Nainá xi kisk̄ī j̄nà x̄it̄a xi kīichj̄a ngajo-la Nainá kj̄otseé. K'oaá s'ín t̄íchj̄a kj̄ot̄ixoma-la Nainá xi t̄ijna n̄it̄a mé n̄achrjein-nè. Jè kjoá'ma-la Nainá, jye kis'enojmí yije-la ngats'īi x̄it̄a naxandá xi t̄j̄ín nga t̄jtsa isò'nde mé-ne nga k̄atas̄íkitas̄on-ne koni s'ín mokjeīn-la.

²⁷ Jè Nainá xi tajngoò ma-ne, xi t̄j̄ín-la kjoáčhj̄ine, k̄atas'e-la kjoá jeya it'aà ts'e Jesucristo n̄it̄a mé n̄achrjein-ne. K'oa's'ín k̄atama.

'Én-lá Nainá xi kjoa ts'e Jesucristo
New Testament in Mazatec, San Jerónimo Tecóatl
Mazateco de S Jeronimo Tecoatl; maa
(MX:maa:Mazatec, San Jerónimo Tecóatl)

copyright © 2013 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Mazateco, San Jerónimo Tecóatl [maa], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, San Jerónimo Tecóatl

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 13 Jul 2024 from source files
dated 29 Jan 2022

9f778253-d34e-5037-af35-7bca16479aa0